

论语点睛

智旭

文硕阁

wenshuoge.com

目录

关于我们	3
学而第一	5
为政第二	9
八佾第三	14
里仁第四	20
公冶长第五	25
雍也第六	31
述而第七	37
泰伯第八	44
子罕第九	48
乡党第十	54
先进第十一	57
颜渊第十二	63
子路第十三	68
宪问第十四	74
卫灵公第十五	83
季氏第十六	91
阳货第十七	94
微子第十八	99
子张第十九	102

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

学而第一

【子曰：“学而时习之，不亦说乎？有朋自远方来，不亦乐乎？人不知而不愠，不亦君子乎？”】

【禅解】

此章以“学”字为宗主，以“时习”二字为旨趣，以“悦”字为血脉。“朋来”及“人不知”，皆是“时习”之时；“乐”及“不愠”皆是“说”之血脉无间断处。

盖人人本有灵觉之性，本无物累，本无不说，由其迷此本体，生出许多恐惧忧患。今学，即是始觉之智，念念觉于本觉，无不觉时，故名“时习”，无时不觉，斯无时不说矣。

此觉原是人所同然，故“朋来”而乐；此觉原无人我对待，故“不知”、“不愠”。夫能历朋来人不知之时，而无不习、无不说者，斯为君子之学。若以知不知二其心，岂孔子之所谓“学”哉！

【有子曰：“其为人也孝弟，而好犯上者，鲜矣；不好犯上，而好作乱者，未之有也。君子务本，本立而道生。孝弟也者，其为仁之本与！”】

【禅解】

为仁，正是“为人”；不仁，便不可为人矣。“作乱”之本，由于“好犯上”；“犯上”之本，由于不孝弟；不孝弟，由于甘心为禽兽。

若不肯做衣冠禽兽、必“孝弟”以“为人”。为人、即仁、义、礼、智自皆具足，故“孝弟”是仁、义、礼、智之本。盖孝弟，是良知、良能；良知、良能，是万事万物之本源也。

【子曰：“巧言令色，鲜矣仁！”】

【禅解】

“巧言”。口为仁者之言也。“令色”，色取仁也。“仁”，是心上工夫，若向言色处下手，则愈似而愈非。

【曾子曰：“吾日三省吾身—为人谋而不忠乎？与朋友交而不信乎？传不习乎？”】

【禅解】

三事，只是己躬下一大事耳。倘有人我二相可得，便不“忠”、“信”；倘非见过于师，便不能“习”。此是既唯一以贯之之后。方有此真实切近功夫。

【子曰：“道千乘之国，敬事而信，节用而爱人，使民以时。”】

【禅解】

五者，以“敬事”为主。敬事，支从敬止功夫得来。

【子曰：“弟子，入则孝，出则弟，谨而信，凡爱众，而亲仁。行有馀力，则以学文。”】

【禅解】

养蒙，莫若学问；学问，不过求放心；求放心，莫若“格物致知”。“孝弟”、“谨信”乃至“学文”，皆格物致知之功也。直教一切时文行合一而修，不是先行后文。盖“文”，是道统所寄，孝、弟、忠、信等，即是“文”之实处，故曰：“文王既没，文不在兹乎？”若仅作“六艺”释之，陋矣！

【子夏曰：“贤贤易色；事父母，能竭其力；事君，能致其身；与朋友交，言而有信。虽曰未学，吾必谓之学矣。”】

【禅解】

“贤贤”，不但是好贤，乃步步趋趋之意。盖自置其身於圣贤之列，此即学之本也。事亲、事君、交友，皆躬行实践，克到圣贤自期待处，所以名为“实学”。

【子曰：“君子不重，则不威；学则不固。主忠信。无友不如己者。过，则勿惮改。”】

【禅解】

期心于大圣大贤，名为“自重”；戒慎恐惧，名为“威”；始觉之功，有进无退，名为“学固”。倘自待稍轻，便不能念念兢业惕厉，而暂觉远迷矣。此直以“不重”为根本病也。

“忠”，则直心、正念、真如；“信”，则的确知得自已可为圣贤，正是自重之处

。既能自重，更须亲师取友，勇于改过，此三，皆对证妙药也。故知今之悦不若己，惮于改过者，皆是自轻者耳。又主忠信，是良药；友不如，惮改过，是药忌。

【曾子曰：“慎终，追远，民德归厚矣。”】

【禅解】

“厚”，是本性之德，复其本性。故似归家。

【子禽问於子贡曰：“夫子至於是邦也，必闻其政，求之与？抑与之与？”子贡曰：“夫子温、良、恭、俭、让以得之。夫子之求之也，其诸异乎人之求之与？”】

【禅解】

此可与“美玉章”参看。子贡以“沽”与“藏”为问，夫子再言“沽”之，只是“待价”二字，便与寻常沽法不同。今子禽以“求”并“与”为问，子贡亦言“求”之，只是说出“温、良、恭、俭、让”五字，便与寻常求法不同。

若竟说不求不沽，则与巢、许何别？若竟说求之沽之，则与功名之士何别？若知舜、禹有天下而不与焉，颜子居陋巷而非置斯民于度外，则知富强礼乐，春风沂水，合则双美，离则两偏矣。

【子曰：“父在，观其志；父没，观其行；三年无改於父之道，可谓孝矣。”】

【禅解】

此总就孝道上说。“观其志”，观其事父之心也；“观其行”，观其居丧之事也。

【有子曰：“礼之用，和为贵。先王之道，斯为美；小大由之。有所不行，知和而和，不以礼节之，亦不可行也。”】

【禅解】

“由之”，由其本和之礼也。“不行”者，废“礼”而尚“和”，礼不行而和亦不可行也。

【有子曰：“信近於义，言可复也。恭近於礼，远耻辱也。因不失其亲，亦可宗也。”】

【禅解】

欲慎终者，全在谋始，只贵“可复”、“可宗”，不必定复、定宗。

【子曰：“君子食无求饱，居无求安，敏於事而慎於言，就有道而正焉，可谓好学也已。”】

【禅解】

“敏事”，如颜子之请事斯语，惟此一事，更非余事也。“慎言”，即所谓仁者其言也切。从敏事处得来，不是两橛，就正“有道”，是慕道集义，不求“安”、“饱”，是箪瓢陋巷家风，非颜子不足以当此，故惟颜子“好学”。

【子贡曰：“贫而无谄，富而无骄，何如？”子曰：“可也；未若贫而乐，富而好礼者也。”子贡曰：“诗云：‘如切如磋，如琢如磨’，其斯之谓与？”子曰：“赐也，始可与言诗已矣，告诸往而知来者。”】

【禅解】

子贡之病，在愿息，文在悦不若己，故因其所明而通之，“告往”“知来”，全是策进他处。道旷无涯，那有尽极，若向乐与礼处坐定，便非“知来”矣。

【子曰：“不患人之不己之，患不知人也。”】

【禅解】

自利则亲师取友，必要知人。利他，则应病与药尤要知人。

为政第二

【子曰：“为政以德，譬如北辰居其所而众星共之。”】

【禅解】

“为政以德”，不是以德为政，须深体此语脉。盖自正正他，皆名“为政”。“以德”者，以一心三观，观于一境三谛，知是性具三德也。三德秘藏，万法之宗；不动道场，万法同会。故譬之以北辰之居所。

【子曰：“诗三百，一言以蔽之，曰：‘思无邪’。”】

【禅解】

此指示一经宗要，令人随文人观，即闻、即思、即修也。若知《诗》之宗要，则知千经万论，亦同此宗要矣。

【子曰：“道之以政，齐之以刑，民免而无耻；道之以德，齐之以礼，有耻且格。”】

【禅解】

五霸虽驾言于德、礼，总只政、刑；帝王虽亦似用政、刑，无非德、礼。盖德、礼，从格物诚意中来，孟子所谓“集义所生”；政、刑，从贤智安排出来；孟子所谓“义袭而取”也。

【子曰：“吾十有五而志于学，三十而立，四十而不惑，五十而知天命，六十而耳顺，七十而从心所欲，不逾矩。”】

【禅解】

只一“学”字到底，学者，觉也。

念念背尘合觉，谓之“志”；觉不被迷情所动，谓之“立”；觉能破微细疑网，谓之“不惑”；觉能透真妄关头，谓之“知天命”；觉六根皆如来藏，谓之“耳顺”；觉六识皆如来藏，谓之“从心所欲，不逾矩”。此是得心自在，若欲得法自在，须至八十、九十，始可几之，故云：“若圣与仁，则吾岂敢”。此孔子之真语实语，若作谦词解释，冤却大圣一生苦心。

返闻闻自性，初须入流亡所，名之为“逆”，逆极而顺，故名“耳顺”，即闻所闻尽，分得耳门圆照三昧也。

【孟懿子问孝。子曰：“无违。”樊迟御，子告之曰：“孟孙问孝於我，我对曰，‘无违’。”樊迟曰：“何谓也？”子曰：“生，事之以礼；死，葬之以礼，祭之以礼。”】

【禅解】

克己复礼，方能以礼事亲，违礼，即非孝矣。

【孟武伯问孝。子曰：“父母唯其疾之忧。”】

【禅解】

此等点示，能令有人心者痛哭。

【子游问孝。子曰：“今之孝者，是谓能养。至於犬马，皆能有养；不敬，何以别乎。”】

【禅解】

以犬马养，但养口体，能养志者，乃名为“敬”。

【子夏问孝。子曰：“色难。有事，弟子服其劳；有酒食，先生馔，曾是以为孝乎？”】

【禅解】

根于心而生于色，孝在心，而不独在事也。

【子曰：“吾与回言终日，不违，如愚。退而省其私，亦足以发，回也不愚。”】

【禅解】

“私”者，人所不见之地，即“慎独”“独”。字。惟孔子具他心道眼，能于语言动静之际，窥见其“私”，故曰：回也其心，三月不违仁。“退”非颜子辞退，乃孔子退而求之于接见问答之表耳。

【子曰：“视其所以，观其所由，察其所安。人焉廋哉？人焉廋哉？”】

【禅解】

己之“所以”、“所由”、“所安”，千停百当，则人之所以、所由、所安，不难视观察矣。故君子但求诸己，如磨镜然。

【子曰：“温故而知新，可以为师矣。”】

【禅解】

观心为“温故”，由观心故，圆解开发。得陀罗尼，为“知新”。盖天下莫故于心，亦莫新于心也。

【子曰：“君子不器。”】

【禅解】

形而上者谓之道，形而下者谓之器，乾坤太极，皆器也。仁者见之谓之仁，智者见之谓之智，无非器也，况瑚琏斗筭，而非器哉！李卓吾云：“下学而上达，便是不器。”此言得之。

【子贡问君子。子曰：“先行其言，而后从之。”】

【禅解】

说得一丈，不如行得一尺，正是此意。

【子曰：“君子周而不比，小人比而不周。”】

【禅解】

生缘、法缘、无缘三慈，皆是“周”；爱见之慈。即是“比”。

【子曰：“学而不思则罔，思而不学则殆。”】

【禅解】

“学而不思”，即有闻无慧；“思而不学”，即有慧无闻。“罔”者，如人数他宝

，自无半钱分也。“殆”者，如增上慢人，堕坑落堑也。

【子曰：“攻乎异端，斯害也已。”】

【禅解】

“端”，头绪也。理本不异，但头绪一差，则天地悬隔。

【子曰：“由！诲女知之乎！知之为知之，不知为不知，是知也。”】

【禅解】

子路向能知所知上用心，意谓无所不知，方名为知”，不是强“不知”以为“知”也。

此则向外驰求，全昧知体，故今直向本体点示，只要认得自己真知之体，更无二知。此与知见立知，即无明本，知见未见，斯即涅槃之旨参看，方见圣人道脉之妙。若舍此而别求知，不异丙丁童子求火，亦似骑牛觅牛矣。

【子张学干禄。子曰：“多闻阙疑，慎言其余，则寡尤。多见阙殆，慎行其余，则寡悔。言寡尤，行寡悔，禄在其中矣。”】

【禅解】

何日无闻，何日未见，闻见不患不多，患不能阙疑殆，慎言行耳。“禄在其中”，是点破天爵天禄，乃吾人真受用处。若作有得禄之道解释，陋矣陋矣！

【哀公问曰：“何为则民服？”孔子对曰：“举直错诸枉，则民服；举枉错诸直，则民不服。”】

【禅解】

惟格物诚意之仁人，为能“举直错枉”，可见民之服与不服，全由己之公私，不可求之于民也。

【季康子问：“使民敬、忠以勤，如之何？”子曰：“临之以庄，则敬；孝慈，则忠；举善而教不能，则勤。”】

【禅解】

“临庄”，从知及仁守发源。知及仁守，只是致知诚意耳。“孝慈”、“举善”、“教不能”，皆是亲民之事，皆是“明德”之所本具。可见圣门为治，别无歧路，此节三个“则”字，上节两个“则”字，皆显示感应不忒之机，全在自己。

【或谓孔子曰：“子奚不为政？”子曰：“书云：‘孝乎惟孝，友于兄弟，施於有政。’是亦为政，奚其为为政？”】

【禅解】

此便是为政以德。

【子曰：“人而无信，不知其可也。大车无輶，小车无輶，其何以行之哉？”】

【禅解】

不信自己可为圣贤，如何进德修业？

【子张问：“十世可知也？”子曰：“殷因於夏礼，所损益，可知也；周因於殷礼，所损益，可知也。其或继周者，虽百世，可知也。”】

【禅解】

来之事，圣人别有心法，与如来性具六通相同，如明镜无所不照；非外道所修作意五通可比也。

子张鹜外，尚未能学孔子之迹，又安可与论及本地工夫，故直以“礼之损益”答之。然礼之纲要，决定不可损益，所损益者，因时制宜，随机设教之事耳。

若知“克己复礼”为仁。则知实智。若知随时损益之致，则知权智。既知“权”、“实”二智，则知来之道，不外此矣。言近指远，善哉善哉！

【子曰：“非其鬼而祭之，谄也。见义不为，无勇也。”】

【禅解】

骂得痛切，激动良心

八佾第三

【孔子谓季氏，“八佾舞於庭，是可忍也，孰不可忍也？”】

【禅解】

卓吾云：季氏要哭。

【三家者以雍彻。子曰：“‘相维辟公，天子穆穆’，奚取於三家之堂？”】

【禅解】

卓吾云：三家要笑。

【子曰：“人而不仁，如礼何？”人而不仁，如乐何？】

【禅解】

世人虽甘心为不仁，未有肯甘弃礼乐者。但既弃仁，即弃礼乐，故就其不肯弃礼乐处唤醒之也。

卓吾云：季氏三家，哭不得，笑不得。

【林放问礼之本。子曰：“大哉问！礼，与齐奢也，宁俭；丧，与其易也，宁戚。”】

【禅解】

“俭”，非礼之本，而近于本，故就此指点，庶可悟本。

【子曰：“夷狄之有君，不如诸夏之亡也。”】

【禅解】

此痛哭流涕之言也。呜呼！可以中国而不如夷乎？

【季氏旅於泰山。子谓冉有曰：“女弗能救与？”对曰：“不能。”子曰：“呜呼！曾谓泰山不如林放乎？”】

【禅解】

卓吾云：季氏间之，不胜扯淡，便是夫子救季氏处。

【子曰：“君子无所争。必也射乎！揖让而升，下而饮。其争也君子。”】

【禅解】

“必也射乎”，正是君子无所争处。

【子夏问曰：“巧笑倩兮，美目盼兮，素以为绚兮。何为也？”子曰：“绘事后素。”曰：“礼后乎？”子曰：“起予者商也！始可与言诗矣。”】

【禅解】

“素以为绚”，谓“倩”、“盼”是天成之美，不假脂粉，自称绝色也。

人巧终逊天工，故曰“绘事后素。”后者，落在第二义之谓。非素质后加五采之解。

“礼后乎”者，直斥后进之礼为不足贵，亦非先后之后。

卓吾云：与言《诗》，非许可子夏也，正是救礼苦心处。

【子曰：“夏礼，吾能言之，杞不足徵也；殷礼，吾能言之，宋不足徵也。文献不足故也。足，则吾能徵之矣。”】

【禅解】

无限感慨。

【子曰：“禘，自既灌而往者，吾不欲观之矣。”】

【禅解】

方外史曰：禅自白椎而往者，吾不欲闻之矣。教自击鼓而往者，吾不欲听之矣。律自发心而往者，吾不欲观之矣。呜呼！古今同一痛心事，世出世法，同一流弊，奈之何哉！

【或问禘之说。子曰：“不知也；知其说者之於天下也，其如示诸斯乎！”指其掌。】

【禅解】

程季清曰：“王者于天下大定之后，方行禘礼。尔时九州之方物，毕贡于前，历代之灵爽，尽格于庙，可谓竖穷横遍，互幽彻明，浹上洽下，无一事一物，不罗列于现前一刹那际矣。示天下如指其掌，不亦宜乎。”

方外史曰：既去“不知”，又“指其掌”，所谓此处无银三十两也。

【祭如在，祭神如神在。子曰：“吾不与祭，如不祭。”】

【禅解】

“与”，许也。“祭如不祭”，谓无诚心之人，故夫子不许之。

【王孙贾问曰：“与其媚于奥，宁媚于灶，何谓也？”子曰：“不然；获罪於天，吾所祷也。”】

【禅解】

卓吾云：媚，便获罪于天矣。

【子曰：“周监於二代，郁郁乎文哉！吾从周。”】

【禅解】

花发之茂，由于培根，礼乐之文，本于至德。至德本于身，而考于古，即是千圣心法，故“从周”，只是以心印心，又“从周”，即从夏、商，即从太古也。

【子入大庙，每事问。或曰：“孰谓鄒人之子知礼乎？入大庙，每事问。”子闻之，曰：“是礼也。”】

【禅解】

卓吾云：只论礼与非礼，那争知与不知。

方外史曰：不知便问，是孔子直心道场处。若云虽知亦问者，谬矣！

【子曰：“射不主皮，为力不同科，古之道也。”】

【子贡欲去告朔之饩羊。子曰：“赐也！尔爱其羊，我爱其礼。”】

【禅解】

子贡见得是羊，孔子见即是礼，推此苦心，便可与读十轮佛藏二经。(二经明剃发染衣者，不论具戒破戒，乃至不曾爱戒，亦是佛弟子相，决定不可毁辱。)

卓吾云：留之，则为礼；去之，则为羊，故云“其羊”、“其礼。”

【子曰：“事君尽礼，人以为谄也。”】

【禅解】

于三宝境，广修供养，人亦以为靡费者多矣，哀哉！

【定公问：“君使臣，臣事君，如之何？”孔子对曰：“君使臣以礼，臣事君以忠。”】

【子曰：“关雎，乐而不淫，哀而不伤。”】

【禅解】

后妃不嫉妒，多求淑女以事西伯，使广继嗣之道，故“乐不淫”、“哀不伤”。若以求后妃，得后妃为解。可笑甚矣。《诗传》、《诗序》皆云“后妃求淑女”，不知紫阳何故别为新说。

【哀公问社於宰我。宰我对曰：“夏后氏以松，殷人以柏，周人以栗，曰，使民战栗。”子闻之，曰：“成事不说，遂事不谏，既往不咎。”】

【禅解】

哀公患三家之强暴，问于有若，有若对曰：“惟礼可御暴乱”。此端本澄源之论也。今云“战栗”以敬神明，似则似矣，然未能事人，焉能事鬼？未知敬止工夫，安能大畏民志哉！

卓吾云：实是说他，谏他，咎他，亦是说哀公，谏哀公，咎哀公。

【子曰：“管仲之器小哉。”或曰：“管仲俭乎？”曰：“管氏有三归，官事不摄，焉得俭？然则管仲知礼乎？”曰：“邦君树塞门，管氏亦树塞门。邦君为两君之好，有反坫，管氏亦有反坫。管氏而知礼，孰不知礼？”】

【禅解】

一匡天下处，是其“仁”。不俭，不知礼处，是其“器小”。孔子论人，何等公平，亦何等明白。盖大器已不至此，况不器之君子乎？

【子语鲁大师乐，曰：“乐其可知也：始作，翕如也；从之，纯如也，缴如也，绎如也，以成。”】

【禅解】

乐是心之声，闻其乐而知其德，故“翕如”、“纯如”等，须从“明德”处悟将来，非安排于音韵之末也。

【仪封人请见，曰：“君子之至於斯也，吾未尝不得见也。”从者见之。出曰：“二三子何患於丧乎？天下之无道也久矣，天将以夫子为木铎。”】

【禅解】

终身定评，千古知己，夫子真万古“木铎”也。

【子谓韶，“尽美矣，又尽善也。”谓武，“尽美矣，未尽善也。”】

【禅解】

觉浪禅师曰：此评乐，非评人也。盖《韶乐》能尽舜帝之美，又能尽舜帝之善；《武乐》能尽武王之美，未能尽武王之善。舜、武，都是圣人，岂有未尽善者。

方外史曰：王阳明谓金之分两不必同，而精纯同，以喻圣之才力不必同，而纯乎天理同，此是千古至论。故孟子曰：行一不义，杀一不辜，而得天下，皆不为也。是则同，亦是此旨。

【子曰：“居上不宽，为礼不敬，临丧不哀，吾何以观之哉？”】

【禅解】

即是吾不欲观之意，非是观其得失

里仁第四

【子曰：“里仁为美。择不处仁，焉得知？”】

【禅解】

里以宅身，尚知“以仁为美”。道以宅心，反不择仁而处，何其重躯壳，而轻性灵也！

【子曰：“不仁者，不可以久处约，不可以长处乐。仁者安仁，知者利仁。”】

【禅解】

见有心外之约乐，便不可久处长处，可见不仁之人，无地可容其身矣。“安仁”，则“约”“乐”皆安；“利仁”，则“约”、“乐”皆利，何等快活受用！

【子曰：“唯仁者，能好人，能恶人。”】

【禅解】

无好、无恶，故能好、能恶。无好、无恶，性量也。能好、能恶，性具也。仁，性体也。

【子曰：“苟志于仁矣，无恶也。”】

【禅解】

千年暗室，一灯能破。

【子曰：“富与贵是人之所欲也，不以其道得之，不处也；贫与贱是人之所恶也，不以其道得之，不去也。君子去仁，恶乎成名？君子无终食之间违仁，造次必于是，颠沛必于是。”】

【禅解】

此章皆诫训之辞，若处非道之富贵，去非道之贫贱，便是“去仁”，便不名为君子。若要真正成个君子，名实相称，须是“终食之间”不违，“造次”“颠沛”不违。

【子曰：“我未见好仁者，恶不仁者。好仁者，无以尚之；恶不仁者，其为仁矣，不使不仁者加乎其身。有能一日用其力于仁矣乎？我未见力不足者。盖有之矣，我未之见也。”】

【禅解】

“恶不仁者”，用个“其为仁矣”四字，便是一串的工夫。

卓吾云：“无以尚之”，“不使不仁者加乎其身”，正是用力力足处。“盖有之矣”，谓世界尔许大，岂无一日用力者，奈我未之见耳。望之之辞，“好仁者”就是惭，“恶不仁者”就是愧。

【子曰：“人之过也，各于其党。观过，斯知仁矣。”】

【禅解】

此法眼也，亦慈心也。世人但于仁中求过耳，孰肯于过中求仁哉！然惟过可以观仁：小人有过，则必文之；仁人有过，必不自掩，故也。

【子曰：“朝闻道，夕死可矣。”】

【禅解】

不闻道者，如何死得！若知死不可免，如何不急求“闻道”。若知“朝闻”可以“夕死”，便知道是竖穷横遍，不是死了便断灭的。

【子曰：“士志于道，而耻恶衣恶食者，未足与议也。”】

【禅解】

当与“食无求饱，居无求安”参看，便见圣贤学脉。

【子曰：“君子之于天下也，无适也，无莫也，义之与比。”】

【禅解】

“义之与比”，正所谓时措之宜，却须从“格物”、“慎独”来。若欲比义，便成“适”、“莫”，义来比我，方见“无适”、“莫处。”

比义，则为义所用；义比，则能用义。比义，则同告子之义外，便成袭取；义比，则同孟子之集义，便是性善。当与赵州使得十二时，《坛经》悟时转法华并参。

【子曰：“君子怀德，小人怀土；君子怀刑，小人怀惠。”】

【禅解】

见德者，不见有土；见土者，不见有德。见法者，不见有惠，见惠者，不见有法。此皆独喻于怀，不可以告人者，譬如饮水冷暖自知而已。

【子曰：“放于利而行，多怨。”】

【禅解】

卓吾云：何利之有。

【子曰：“能以礼让为国乎？何有？不能以礼让为国，如礼何？”】

【禅解】

能以礼让，不但用得礼，亦为得国。不能以礼让为国，不但治不得国，亦用不得礼。

【子曰：“不患无位，患所以立；不患莫己知，求为可知也。”】

【禅解】

此对治悉檀，亦阿伽良药也。

【子曰：“参乎！吾道一以贯之。”曾子曰：“唯。”子出。门人问曰：“何谓也？”曾子曰：“夫子之道，忠恕而已矣。”】

【禅解】

此切示下手工夫，不是印证，正是指点初心，须向一门深入耳。“忠恕”真实贯得去，亦是有个省处，乃能如此答话，然不可便作传道看。颜子既没，孔子之道的无正传，否则两叹“今也则亡”，岂是诳语。

【子曰：“君子喻于义，小人喻于利。”】

【禅解】

“喻”字，形容君子小人心事，曲尽其致。“喻义”，故利亦是义。“喻利”，故义亦是利。释门中发菩提心者，世法亦成佛法，名利未忘者，佛法亦成世法，可为同喻。

【子曰：“见贤思齐焉，见不贤而内自省也。”】

【禅解】

方是“惭愧”二字实义，方是“三人行，必有我师”，方可云尽大地无不是药。此圣贤、佛祖总诀也。

【子曰：“事父母几谏。见志不从，又敬不违，劳而不怨。”】

【禅解】

始终只一“几谏”。“几谏”只是敬父母，故期之以圣贤。“不违”、“不怨”，只是到底敬父母。

【子曰：“父母在，不远游。游必有方。”】

【禅解】

“方”。法也。为法故游，不为余事也。“不远游”句，单约“父母在”说。“游必有方”，则通于存没矣。

【子曰：“三年无改于父之道，可谓孝矣。”】

【子曰：“父母之年，不可不知也。一则以喜，一则以惧。”】

【禅解】

“喜”、“惧”处，正是知处。不喜、不惧，便是不知。

【子曰：“古者言之不出，耻躬之不逮也。”】

【禅解】

为之难，言之得无切乎？

【子曰：“以约失之者鲜矣。”】

【禅解】

观心为要。

【子曰：“君子欲讷于言而敏于行。”】

【禅解】

“讷言”、“敏行”，只是一事，观“欲”字而字便知。

【子曰：“德不孤，必有邻。”】

【禅解】

千里比肩，百世接踵。

卓吾云：有一善端，众善毕至。

方外史曰：此约观心释也。

【子游曰：“事君数，斯辱矣，朋友数，斯疏矣。”】

【禅解】

“辱”，则不能事其君。“疏”，则不能交其友。不数，正是纳忠尽谊之法，非为求荣求亲而已，亦非当去当止之谓。

公冶长第五

【子谓公冶长，“可妻也。虽在缙纆之中，非其罪也”。以其子妻之。子谓南容，“邦有道，不废；邦无道，免于刑戮”。以其兄之子妻之。】

【禅解】

曰“非其罪”，曰“免于刑戮”，只论立身，不论遇境，今人还知此意否？

【子谓子贱，“君子哉若人！鲁无君子者，斯焉取斯”？】

【禅解】

卓吾云：把子贱来做一尊贤取友的榜样，非特赞子贱已也。

【子贡问曰：“赐也何如？”子曰：“女器也。”曰：“何器也？”曰：“瑚琏也。”】

【禅解】

卓吾批“问”处云：也自负。

方外史曰：只因子贡自负，所以但成一器，不能到君子不器地位。

【或曰：“雍也仁而不佞。”子曰：“焉用佞？御人以口给，屡憎于人。不知其仁，焉用佞？”】

【禅解】

“不知其仁”，谓佞者本具仁理，而全不自知，可见佞之为害甚也。

【子使漆雕开仕。对曰：“吾斯之未能信。”子说。】

【禅解】

唯其信有斯事，所以愈觉“未能信”也。今之硬作主宰，错下承当者，皆未具信根故耳。“寡过未能”，“圣仁岂敢”，既不生退屈，亦不增上慢。其深知六即者乎？

【子曰：“道不行，乘桴浮于海。从我者其由与？”子路闻之喜。子曰：“由也好勇过我，无所取材。”】

【禅解】

正为点醒子路而发，非是叹道不行。

【孟武伯问：“子路仁乎？”子曰：“不知也。”又问。子曰：“由也，千乘之国，可使治其赋也，不知其仁也。”“求也何如？”子曰：“求也，千室之邑，百乘之家，可使为之宰也，不知其仁也。”

“赤也何如？”子曰：“赤也，束带立于朝，可使与宾客言也，不知其仁也。”】

【禅解】

此与下论“言志章”参看，便见夫子深知三人处。

【子谓子贡曰：“女与回也孰愈？”对曰：“赐也何敢望回。回也闻一以知十，赐也闻一以知二。”子曰：“弗如也！吾与女弗如也。”】

【禅解】

子贡之“亿则屡中”是病，颜子之“不违如愚”是药，故以药病对拈，非以胜负相形也。

子贡一向落在闻见知解窠臼，却谓颜子“闻一知十”，虽极赞颜子，不知反是谤颜子矣，故夫子直以：“弗如”二字贬之。

盖凡知见愈多，则其去道愈远。幸而子贡只是“知二”，若使“知三”，“知四”，乃至“知十”，则更不可救药。故彼自谓“弗如”之处，正是可与之处。如此点示，大有禅门杀活全机，惜当机之未悟，恨后儒之谬解也。

【宰予昼寝。子曰：“朽木不可雕也，粪土之墙不可朽也，于予与何诛。”子曰：“始吾于人也，听其言而信其行；今吾于人也，听其言而观其行。于予与改是。”】

【禅解】

责宰我处，可谓雪上加霜。

卓吾云：乃牵联春秋之笔。

【子曰：“吾未见刚者。”或对曰：“申枨。”子曰：“枨也欲，焉得刚？”】

【禅解】

只说枨是“欲”不是“刚”，不可以“刚”与“欲”对泐，以对“欲”说“刚”，非真刚故。

【子贡曰：“我不欲人之加诸我也，吾亦欲无加诸人。”子曰：“赐也，非尔所及也。”】

【禅解】

卓吾云：推他上路。

【子贡曰：“夫子之文章，可得而闻也；夫子之言性与天道，不可得而闻也。”】

【禅解】

言“性”言“天”，便成文章，因指见月，便悟“性”、“天。”子贡此言，只得一半。若知文字相即解脱相，则闻即无闻。若知不可说法，有因缘故，亦可得说，则无闻即闻。

【子路有闻，未之能行，唯恐有闻。】

【禅解】

卓吾云：画出于路。

方外史曰：子路长处在此，病处亦在此。若知不许夜行，投明须到之理，便如颜子之从容请事矣。

【子贡问曰：“孔文子何以谓之文也？”子曰：“敏而好学，不耻下问，是以谓之文也。”】

【禅解】

卓吾云：于子贡身上，亦甚有益。盖“愿息”、“悦不若己”，是子贡病痛耳。

【子谓子产，“有君子之道四焉：其行己也恭，其事上也敬，其养民也惠，其使民也义。”】

【禅解】

不遗纤吾。

【子曰：“晏平仲善与人交，久而敬之。”】

【禅解】

卓吾云：“久而敬之”四字，的是交法。

【子曰：“臧文仲居蔡，山节藻梲，何如其知也？”】

【禅解】

卓吾云：夫子论“知”，只是务民之义，敬鬼神而远之。

【子张问曰：“令尹子文三仕为令尹，无喜色；三已之，无愠色。旧令尹之政，必以告新令尹。何如？”子曰：“忠矣。”曰：“仁矣乎？”曰：“未知，焉得仁？”“崔子弑齐君，陈文子有马十乘，弃而违之。至于他邦，则曰：‘犹吾大夫崔子也。’违之。之一邦，则又曰：‘犹吾大夫崔子也。’违之。何如？”子曰：“清矣。”曰：“仁矣乎？”曰：“未知。焉得仁？”】

【禅解】

仁者必“忠”，“忠”者未必“仁”，“仁”者必“清”，“清”者未必“仁”。

卓吾云：仲尼认得“仁”字真。

【季文子三思而后行。子闻之，曰：“再，斯可矣。”】

【禅解】

卓吾云：“三”，疑也。“再”，决也。要知“三”不是三遭，“再”不是两次。

【子曰：“宁武子邦有道则知，邦无道则愚。其知可及也，其愚不可及也。”】

【子在陈曰：“归与！归与！吾党之小子狂简，斐然成章，不知所以裁之。”】

【禅解】

木铎之任，菩萨之心。

【子曰：“伯夷、叔齐不念旧恶，怨是用希。”】

【禅解】

周季侯曰：“旧”字，如飞影驰轮，倏焉过去之谓。

方外史曰：如明镜照物，妍媸皆现，而不留陈影。此与“不迁怒”同一工夫。

【子曰：“孰谓微生高直？或乞醯焉，乞诸其邻而与之。”】

【禅解】

卓吾云：维直道也，非讥议微生高也。

【子曰：“巧言、令色、足恭，左丘明耻之，丘亦耻之。匿怨而友其人，左丘明耻之，丘亦耻之。”】

【禅解】

读此便知《春秋》宗旨。《春秋》只是扶三代之直道耳。

【颜渊、季路侍。子曰：“盍各言尔志？”子路曰：“愿车马、衣轻裘，与朋友共。敝之而无憾。”颜渊曰：“愿无伐善，无施劳。”子路曰：“愿闻子之志。”子曰：“老者安之，朋友信之，少者怀之。”】

【禅解】

子路忘物，颜子忘善，圣人忘己。忘己，故以“安”还老者，“信”还朋友，“怀”还少者。

【子曰：“已矣乎！吾未见能见其过而内自讼者也。”】

【禅解】

千古同慨。盖“自讼”，正是圣贤心学真血脉。

【子曰：“十室之邑，必有忠信如丘者焉，不如丘之好学也。”】

【禅解】

孔子之“忠信”与人同，只是“好学”与人异。“好学”二字，是孔子真面目，故颜渊死，遂哭云：“天丧予。”

雍也第六

【子曰：“雍也可使南面。”仲弓问子桑伯子，子曰：“可也简。”仲弓曰：“居敬而行简，以临其民，不亦可乎？居简而行简，无乃大简乎？”子曰：“雍之言然。”】

【禅解】

只是论“临民”之道，不是去批点子桑伯子。

【哀公问：“弟子孰为好学？”孔子对曰：“有颜回者好学，不迁怒，不二过，不幸短命死矣。今也则亡，未闻好学者也。”】

【禅解】

无怒、无过，本觉之体；“不迁”、“不贰”，始觉之功，此方是真正好学。曾子以下，的确不能通此血脉，孔子之道，的确不曾传与他人。

有所断故，名为“不迁”、“不贰”。若到无所断时，则全合无怒、无过之本体矣。孔子、颜渊，皆居学地，人那得知。

【子华使于齐，冉子为其母请粟。子曰：“与之釜。”清益。曰：“与之庾。”冉子与之粟五秉。子曰：“赤之适齐也，乘肥马，衣轻裘。吾闻之也：君子周急，不继富。”原思为之宰，与之粟九百，辞。子曰：“毋以与尔邻里乡党乎！”】

【子谓仲弓曰：“犁牛之子且角，虽欲勿用，山川其舍诸？”】

【禅解】

卓吾云：夫子论仲弓如此耳。

【子曰：“回也，其心三月不违仁。其余，则日月至焉而已矣。”】

【禅解】

颜渊心“不违仁”，孔子向何处知之？岂非法眼、他心智耶？

“三月”者，如佛家九旬办道之期。“其心”、“其余”，皆指颜子而说，只因心“不违仁”，得法源本，则其余枝叶，日新月盛，德业并进矣。此方是“温故知新

”。

【季康子问：“仲由可使从政也与？”子曰：“由也果，于从政乎何有？”曰：“赐也，可使从政也与？”曰：“赐也达，于从政乎何有？”曰：“求也，可使从政也与？”曰：“求也艺，于从政乎何有？”】

【季氏使闵子骞为费宰。闵子骞曰：“善为我辞焉。如有复我者，则吾必在汶上矣。”】

【禅解】

有志气，有节操，羞杀仲由、冉求。

【伯牛有疾，子问之，自牖执其手，曰：“亡之，命矣夫！斯人也而有斯疾也！斯人也而有斯疾也！”】

【禅解】

说一“命”字，便显得是宿业，便知为善无恶果。

【子曰：“贤哉，回也！一簞食，一瓢饮，在陋巷。人不堪其忧，回也不改其乐。贤哉，回也！”】

【禅解】

乐不在簞、瓢、陋巷，亦不离簞、瓢、陋巷，簞、瓢、陋巷，就是他真乐处。惟仁者可久处约，约处就是安处利处。若去簞、瓢、陋巷非可乐，则离境谈心，何啻万里。

【冉求曰：“非不说子之道，力不足也。”子曰：“力不足者，中道而废。今女画。”】

【子谓子夏曰：“女为君子儒，无为小人儒。”】

【禅解】

从性天生文章，便是“君子儒”；从文章著脚，便是“小人儒”。即下学而上达，便是“君子儒”；滞于下学，便是“小人儒”。若离下学而空谈上达，不是“君子儒”，亦不是“小人儒”，便是今时狂学者。

【子游为武城宰。子曰：“女得人焉尔乎？”曰：“有澹台灭明者，行不由径。非公事，未尝至于偃之室也。”】

【禅解】

卓吾云：真能得人。

【子曰：“孟之反不伐，奔而殿。将入门，策其马，曰：‘非敢后也，马不进也。’”】

【子曰：“不有祝鮀之佞，而有宋朝之美，难乎免于今之世矣。”】

【子曰：“谁能出不由户，何莫由斯道也？”】

【禅解】

道不可须臾离，信然信然，何故世人习而不察，日用不知。

【子曰：“质胜文则野，文胜质则史，文质彬彬，然后君子。”】

【禅解】

“质”如树茎、“文”如花叶，还有一个树根。由有树根，故使茎枝、花叶皆是一团生机。“彬彬”者，生机焕彩也。

【子曰：“人之生也直，罔之生也幸而免。”】

【禅解】

卓吾云：不直的都是死人。

【子曰：“知之者，不如好之者。好之者，不如乐之者。”】

【禅解】

知个甚么？好个甚么？乐个甚么？参！

卓吾云：不到乐的地步，那得知此？

【子曰：“中人以上，可以语上也。中人以下，不可以语上也。”】

【禅解】

“不可语上”，须以上作下说、为实施权也。“可以语上”，方知语语皆上，开权显实也。

【樊迟问知，子曰：“务民之义，敬鬼神而远之，可谓知矣。”问仁，曰：“仁者先难而后获，可谓仁矣。”】

【禅解】

晓得民义，便晓得鬼神道理。惟其晓得，所以能“敬”能“远”，非以不可知而“敬”之“远”之也。不能“先难”，便欲商及获与不获，知难非难，则请事斯语，欲罢不能，岂获与不获，可动其心！

【子曰：“知者乐水，仁者乐山。知者动，仁者静。知者乐，仁者寿。”】

【禅解】

形容得妙。“智者”、“仁者”，不是指两人说。“乐”者，效法也。智法水，仁法山。法水故动，法山故静。动故乐，静故寿。

山水同依于地，动静同一心机，乐寿同一身受，智仁同一性真。若未达不二而二，二而不二，则“仁者见之谓之仁，智者见之谓之智”矣。

【子曰：“齐一变，至于鲁。鲁一变，至于道。”】

【禅解】

总是要他“至于道”耳。

吴因之曰：齐固要脱皮换骨，鲁也要涤胃洗肠。

【子曰：“觚不觚，觚哉！觚哉！”】

【宰我问曰：“仁者虽告之曰：‘井有仁焉’其从之也？”子曰：“何为其然也？君子可逝也，不可陷也。可欺也，不可罔也。”】

【禅解】

此问大似禅机。盖谓君子既依于仁，设使仁在井中，亦从而依之乎？夫子直以正理答之，不是口头三昧可比。

陈晏昭曰：“宰我此问，深得夫子之心。盖在夫子，设使见人坠井，决能跳下井中救出。但此非圣人不能，不可传继，故夫子直以可继可传之道答之。如大舜方可浚井，以听父母之？，彼有出路故也。若寻常孝子，小杖则受，大杖则走矣。

【子曰：“君子博学于文，约之以礼，亦可以弗畔矣夫？”】

【禅解】

“学于文”，乃就闻以开觉路，不同贫数他宝。“约以礼”，乃依解而起思修，所谓“克己复礼”，不同无闻暗证，所以“弗畔”。“畔者”，边畔。以文字阿师，偏于教相之一边暗证禅和，偏于内观之一边，不免罔殆之失也。

【子见南子，子路不说。夫子矢之曰：“子所否者，天厌之！天厌之！”】

【禅解】

卓吾云：“子路不说”，全从夫子拒弥子来，意谓既曰“有命矣”，缘何又见南子？

【子曰：“中庸之为德也，其至矣乎！民鲜久矣。”】

【子贡曰：“如有博施于民，而能济众，何如？可谓仁乎？”子曰：“何事于仁！必也圣乎！尧、舜其犹病诸。夫仁者，己欲立而立人，己欲达而达人，能近取譬，可谓仁之方也已。”】

【禅解】

“博施”“济众”，果地化他之德，“欲立”、“欲达”，因中二利之始。子贡求之于果，不知明其真因。

“己欲立而立人，己欲达而达人，”不是以己及人，正是自、他不二。只向一念观心处下手也。“立”，即不思議止；“达”，即不思議观。

佛法太高，众生法太广，观心则易，故去“能近取譬”，是“仁之方”。“方”，

法也。

“立人”、“达人”，正是“博施”“济众”处。“尧舜犹病”，正是“欲立”“欲达”处。“仁”，通因果；“圣”，惟极果。尧舜尚在因位，惟佛方名果位耳。

述而第七

【子曰：“述而不作，信而好古，窃比于我老彭。”】

【禅解】

“述而不作”，只因信得理无可作。既“信”得及，自然“好古”，此夫子真道脉，真学问也。

卓吾云：都是实话，何云谦词？

【子曰：“默而识之，学而不厌，诲人不倦，何有于我哉！”】

【禅解】

“学不厌”，“诲不倦”，孔子亦曾承当之矣。只一“默而识之”，真实难到，宜其直心直口说出。

【子曰：“德之不修，学之不讲，闻义不能徙，不善不能改，是吾忧也。”】

【禅解】

真实可忧，世人都不知忧，所以毫无真乐。惟圣人念念忧，方得时时乐。

【子之燕居，申申如也，天天如也。】

【子曰：“甚矣吾衰也！久矣吾不复梦见周公。”】

【禅解】

卓吾云：壮哉！

方外史曰：人老心不老。

【子曰：“志于道，据于德，依于仁，游于艺。”】

【禅解】

卓吾云：学问阶级。

方外史曰：虽有阶级，不是渐次，可谓六而常即。

【子曰：“自行束修以上，吾未尝无诲焉。”】

【子曰：“不愤不启，不悱不发。举一隅，不以三隅反，则不复也。”】

【禅解】

卓吾云：读此二章，乃见“诲人不倦”。

【子食于有丧者之侧，未尝饱也。子于是日哭，则不歌。】

【子谓颜渊曰：“用之则行，舍之则藏，惟我与尔有是夫！”子路曰：“子行三军，则谁与？”子曰：“暴虎馮河，死而无悔者，吾不与也。必也临事而惧，好谋而成者也。”】

【禅解】

“临事而惧”，从戒慎恐惧心法中来。“好谋而成”，从好问好察，用中于民而来。不但可与行军，即便可与用行舍藏。否。则白刃可蹈，中庸不可能矣。

卓吾云：三“与”字，当一般看，若作仲尼牵连自家说，恐圣人无此等气象。

【子曰：“富而可求也，虽执鞭之士，吾亦为之。如不可求，从吾所好。”】

【禅解】

说得求富者败兴。

卓吾云：今之求富贵者，俱是“执鞭之士”。

方外史曰：执鞭求富，还是好的。今之求富贵者，决非“执鞭之士”所屑。

【子之所慎，齐、战、疾。】

【子在齐闻《韶》，三月不知肉味，曰：“不图为乐之至于斯也。”】

【禅解】

赞得《韶乐》，津津有味。

【冉有曰：“夫子为卫君乎？”子贡曰：“诺，吾将问之。”人，曰：“伯夷、叔齐，何人也？”曰：“古之贤人也。”曰：“怨乎？”曰：“求仁而得仁，又何怨？”出，曰：“夫子不为也。”】

【禅解】

非说二人以失国为悔也。只是二人既去，设无中子可立，则废宗绝嗣，能不动心否乎？既曰：“求仁得仁”，则世间宗嗣，又其最小者矣，何足介意。

【子曰：“饭疏食，饮水，曲肱而枕之，乐亦在其中矣。不义而富且贵，于我如浮云。”】

【禅解】

“乐在其中”，则心境一如，当与赞颜子处参看。“不义富贵”，但如“浮云”，则似太虚不染，非巢、许之所能达。

【子曰：“加我数年，五十以学《易》，可以无大过矣。”】

【禅解】

学《易》方无大过，《易》其可不学乎？今有穷年读《易》，而过终不寡者，其可称学《易》乎？

【子所雅言，《诗》、《书》、执礼，皆雅言也。】

【禅解】

果然不俗。今人不知《诗》、《书》、《礼》，所开口便俗。

【叶公问孔子于子路，子路不对。子曰：“女奚不曰：其为人也，发愤忘食，乐以忘忧，不知老之将至云尔。”】

【禅解】

这才是为人的。今只偷得一人生耳，何尝肯为人哉！既是不肯为人，所以真一失人身万劫难也。

王阳明日：“发愤忘食”，是圣人之志如此，真无有已时；“乐以忘忧”，是圣人之道如此，真无有戚时，恐不必云得不得也。

【子曰：“我非生而知之者，好古敏以求之者也。”】

【禅解】

卓吾云：都是实话。

方外史曰：不但释迦尚示六年苦行，虽弥勒即日出家。即日成道，亦是三大阿僧祇劫修来的。

【子不语怪、力、乱、神。】

【禅解】

今人拨无“怪”、无“神”，亦可拨无“力”、无“乱”否？

【子曰：“三人行，必有我师焉。择其善者而从之，其不善者而改之。”】

【禅解】

师心之人，那知此益。

【子曰：“天生德于予，桓魋其如予何？”】

【禅解】

卓吾云：却又微服而过宋，妙妙。

方外史曰：王莽学之，便是东施。

【子曰：“二三子以我为隐乎？吾无隐乎尔。吾无行而不与二三子者，是丘也。”】

【禅解】

卓吾云：和盘托出。

方外史曰：正惟和盘托出，“二三子”益不能知。如目连欲穷佛声，应持欲见佛顶，何处用耳？何处著眼？

【子以四教，文、行、忠、信。】

【子曰：“圣人吾不得而见之矣，得见君子者，斯可矣。”子曰：“善人吾不得而见之矣，得见有恒者，斯可矣。亡而为有，虚而为盈，约而为泰。难乎有恒矣。”】

【禅解】

“圣人”只是证得本亡本虚本约之理，“有恒”须是信得本亡本虚本约之理。就从此处下手，便可造到圣人地位，所谓以不生不灭为本修因，然后圆成果地修证也。

“亡”，是真谛。“虚”，是俗谛。“约”是中谛。依此而修，为三止三观，证此妙理，成三德三身。

【子钓而不纲，弋不射宿。】

【禅解】

现同恶业，曲示善机，可与六祖吃肉边菜同参。

【子曰：“盖有不知而作之者，我无是也。多闻，择其善者而队之；多见而识之，知之次也。”】

【禅解】

“知”便不“作”，“作”便不“知。”

卓吾云：甘心为次，所以为上。

方外史曰：今之高谈向上，耻居学地者，愧死，愧死。

【互乡难与言，童子见，门人惑。子曰：“与其进也，不与其退也，唯何甚！人洁己以进，与其洁也，不保其往也。”】

【禅解】

卓吾云：天地父母之心。

【子曰：“仁远乎哉？我欲仁，斯仁至矣。”】

【禅解】

“欲仁”即“仁”，仁体即是本来至极之体，犹所云“念佛心”即是“佛”也。．

【陈司败问：“昭公知礼乎？”孔子曰：“知礼。”孔子退，揖巫马期而进之，曰：“吾闻君子不党，君子亦党乎？君取于吴，为同姓，谓之吴孟子。君而知礼，孰不知礼？”巫马期以告，子曰：“丘也幸，苟有过，人必知之。”】

【禅解】

不似今人强辩饰非。．

【子与人歌而善，必使反之，而后和之。】

【子曰：“文，莫吾犹人也。躬行君子，则吾未之有得。”】

【禅解】

也是千真万真之语。

【子曰：“若圣与仁，则吾岂敢？抑为之不厌，诲人不倦，则可谓云尔已矣。”公西华曰：“正唯弟子不能学也。”】

【禅解】

更真。

卓吾云：公西华亦慧。

【子疾病，子路请祷。子曰：“有诸？”子路对曰：“有之。诂曰：‘祷尔于上下神祇。’”子曰：“丘之祷久矣。”】

【禅解】

可与谈三种忏法。

【子曰：“奢则不孙，俭则固，与其不孙也，宁固。”】

【禅解】

此与对林放同意。

卓吾云：救世苦心。

【子曰：“君子坦荡荡，小人长戚戚。”】

【禅解】

“荡荡”，即“坦”字之注脚，所谓居易以俟命也，却是戒慎恐惧之体。“戚戚”，正是无忌惮处，思之，思之。

【子温而厉，威而不猛，恭而安。】

【禅解】

像赞。

泰伯第八

【子曰：“泰伯，其可谓至德也已矣。三以天下让，民无得而称焉。”】

【禅解】

“三让”，究竟让也；“以天下让”，以天下之故而行让也。此时文王已生，纣亦初生，泰伯预知文王之德，必能善服事殷，救纣之失，故让国与之，令扶商之天下。是故文王之至德，人皆知之；泰伯之至德，又在文王之先，而人罔克知也。至于文王既没，纣终不悛，至使武王伐纣，则非泰伯之所料矣。

【子曰：“恭而无礼则劳，慎而无礼则蒺，勇而无礼则乱，直而无礼则绞。君子笃于亲，则民兴于仁；故旧不遗，则民不偷。”】

【禅解】

此二节正是敦厚以崇礼的注脚。

【曾子有疾，召门弟子曰：“启予足！启予手！诗云‘战战兢兢，如临深渊，如履薄冰。’而今而后，吾知免夫！小子！”】

【禅解】

即明且哲，以保其身。推而极之，则佛临涅槃时，披衣示金身，令大众谛观，亦是此意，但未可与著相愚人言也。

【曾子有疾，孟敬子问之。曾子言曰：“鸟之将死，其鸣也哀；人之将死，其言也善。君子所贵乎道者三：动容貌，斯远暴慢矣；正颜色，斯近信矣；出辞气，斯远鄙倍矣。笾豆之事，则有司存。”】

【禅解】

三个“斯”字，皆是诚于中，形于外，不假勉强。

【曾子曰：“以能问于不能，以多问于寡；有若无，实若虚，犯而不校，昔者吾友尝从事于斯矣。”】

【禅解】

在颜子分中，直是无能，无多，本无，本虚，本不见有犯者，犯事及受犯者，但就曾子说他，便云“以能问于不能”等耳。若见有能，便更无问于不能之事，乃至若见有犯，纵使不报，亦非不校矣。

卓吾云：不但想他人前日而已，自家今日亦要下手矣。

【曾子曰：“可以托六尺之孤，可以寄百里之命，临大节而不可夺也。君子人与？君子人也。”】

【禅解】

有才有德，故是君子。末二句是赞体，非设为问答。

【曾子曰：“士不可以不弘毅，任重而道远。仁以为己任，不亦重乎？死而后已，不亦远乎？”】

【禅解】

“弘毅”二字甚妙。横广竖深，横竖皆不思议，但“死而后已”四字甚陋。孔子云：“朝闻道，夕死可矣。”便是死而不已。又云：“未知生，焉知死？”便是死生一致。故知曾子只是世间学问，不曾传得孔子出世心法。孔子独叹颜回好学，良不诬也。

【子曰：“兴于《诗》，立于《礼》，成于《乐》。”】

【禅解】

读《诗》而不能兴，读《礼》而不能立，习《乐》而不能成，何用《诗》、《礼》、《乐》耶？

【子曰：“民可使由之，不可使知之。”】

【禅解】

若但赞一乘，众生没在苦，故不可使“知之”。机缘若熟，方可开权显实。“不可”二字，正是观机之妙。

【子曰：“好勇疾贫，乱也。人而不仁，疾之已甚，乱也。”】

【子曰：“如有周公之才之美，使骄且吝，其余不足观也已。”】

【禅解】

卓吾云：无周公之才美而骄吝者，岂不愧死！

【子曰：“三年学，不至于谷，不易得也。”】

【子曰：“笃信好学，守死善道。危邦不入，乱邦不居。天下有道则见，无道则隐。邦有道，贫且贱焉，耻也；邦无道，富且贵焉，耻也。”】

【禅解】

信得人人可为圣贤，名“笃信”。立地要成圣贤，名“好学”。假使铁轮顶上旋，定慧圆明终不失，名“守死善道”。

“危邦不入”四句，正是“守死善道”注脚，正从“笃信好学”得来。“邦有道”节，正是反显其失。

【子曰：“不在其位，不谋其政。”】

【禅解】

约事，即是素位而行，不愿乎外。约观，节是随境炼心，不发不观。

【子曰：“师挚之始，关雎之乱，洋洋乎！盈耳哉。”】

【子曰：“狂而不直，侗而不愿，怍怍而不信，吾不知之矣。”】

【禅解】

大家要自己简点，勿堕此等坑塹。

【子曰：“学如不及，犹恐失之。”】

【子曰：“巍巍乎！舜禹之有天下也，而不与焉。”】

【禅解】

无天下者，亦非“巍巍”，巢、许是也。有天下者，亦非“巍巍”，寻常贤君是也。“有天下而不与”，方为不可思议。

【子曰：“大哉尧之为君也！巍巍乎！唯天为大，唯尧则之。荡荡乎！民无能名焉。巍巍乎！其有成功也；焕乎，其有文章！”】

【禅解】

卓吾云：末节正是则天实际处。

【舜有臣五人而天下治。武王曰：“予有乱臣十人。”孔子曰：“才难，不其然乎？唐虞之际，于斯为盛。有妇人焉，九人而已。三分天下有其二，以服事殷。周之德，其可谓至德也已矣。”舜有臣五人而天下治。】

【禅解】

叹“才难”而赞“至德”，正因“德难”，故“才难”耳。倘纣有圣德，则武王并九人，方将同为纣之良臣，又何必以“乱臣”称哉！“亢龙有悔”，武王之不幸也甚矣！

【子曰：“禹，吾无间然矣。菲饮食，而致孝乎鬼神；恶衣服，而致美乎黻冕；卑宫室，而尽力乎沟洫。禹，吾无间然矣。”】

【禅解】

如此方“无间然”，为君者，可弗思乎？

子罕第九

【子罕言利与命与仁。】

【禅解】

卓吾云：“罕言利”，可及也。“罕言利与命与仁”，不可及也。

方外史曰：“言命”、“言仁”，其害与“言利”同，所以“罕言”。今人将“命”与“仁”挂在齿颊，有损无益。

【达巷党人曰：“大哉孔子！博学而无所成名。”子闻之，谓门弟子曰：“吾何执？执御乎？执射乎？吾执御矣。”】

【禅解】

卓吾云：“谓门弟子”之言，不敢自安之语也。然“党人”，则孔子知己矣。

【子曰：“麻冕，礼也；今也纯，俭。吾从众。拜下，礼也；今拜乎上，泰也。虽违众，吾从下。”】

【禅解】

卓吾云：真是时中之圣。

【子绝四：毋意，毋必，毋固，毋我。】

【禅解】

由诚意，故“毋意”；毋意，故“毋必”；毋必，故“毋固”；毋固，故“毋我。”

细灭，故粗必随灭也。由达无我，方能诚意，不于妄境生妄惑。“意”是惑，“必”、“固”是业，“我”是苦。

【子畏于匡曰：“文王既没，文不在兹乎？天之将丧斯文也，后死者不得与于斯文也；天之未丧斯文也，匡人其如予何？”】

【禅解】

道脉流通!即是“文”，非谦词也。如此自信，何尝有“畏”！

【大宰问于子贡曰：“夫子圣者与？何其多能也？”子贡曰：“固天纵之将圣，又多能也。”子闻之，曰：“大宰知我乎！吾少也贱，故多能鄙事。君子多乎哉？不多也。”牢曰：“子云，‘吾不试，故艺’。”】

【禅解】

“固天纵之”为一句，子贡谓夫子直是“天纵之”耳，岂可将圣人只是“多能”者耶!此必已闻“一以贯之”，故能如此答话。然在夫子，的确不敢承当“圣人”二字，故宁受“多能”二字。而“多能”甚鄙甚贱，决非君子之道也。大宰此问，与党人见识，天地悬隔。

【子曰：“吾有知乎哉？无知也。有鄙夫问于我，空空如也，我叩其两端而竭焉。”】

【禅解】

不但无人问时，体本无知，即正当有人问时，仍自“空空”，仍“无知也。”所“叩”者，即“鄙夫”之“两端”；所“竭”者，亦即“鄙夫”之“两端”，究竟吾何知哉。既“叩其两端”而“竭”之，则“鄙夫”亦失其妄知，而归于“无知”矣。

【子曰：“凤鸟不至，河不出图，吾已矣夫！”】

【禅解】

此老热肠犹昔。

【子见齐衰者、冕衣裳者与瞽者，见之，虽少必作；过之，必趋。】

【颜渊喟然叹曰：“仰之弥高，钻之弥坚；瞻之在前，忽焉在后。夫子循循然善诱人，博我以文，约我以礼。欲罢不能，既竭吾才，如有所立卓尔。虽欲从之，末由也已。”】

【禅解】

此与“问仁章”参看，便见颜子真好学，又见颜子正在学地，未登无学。

“约我以礼”，正从“克己复礼”处悟来。“欲罢不能”，正从“请事斯语”处起手。“欲从未由”，正是知此道非可仰钻前后而求得者。两个“我”字，正即克己、由己之“己”字。

王阳明曰：谓之有，则非有也，谓之无，则非无也。

【子疾病，子路使门人为臣。病闲，曰：“久矣哉！由之行诈也，无臣而为有臣。吾谁欺？欺天乎？且予与其死于臣之手也，无宁死于二三子之手乎？且予纵不得大葬，予死于道路乎？”】

【禅解】

子路一种流俗知见，被夫子骂得如此刻毒。今有禅门释子，开丧戴孝，不知何面目见孔子？不知何面目见六祖？不知何面目见释迦？

【子贡曰：“有美玉于斯，韞并而藏诸？求善贾而沽诸？”子曰：“沽之哉！沽之哉！我待贾者也。”】

【禅解】

“沽”同，而“待”与“求”不同。世人不说“沽”，便说“藏”耳，那知此意。

【子欲居九夷。或曰：“陋，如之何！”子曰：“君子居之，何陋之有？”】

【禅解】

卓吾云：先辈谓当问其居不居，不当问其陋不陋，最为得之。

【子曰：“吾自卫反鲁，然后乐正，雅颂各得其所。”】

【禅解】

亦是“木铎”之职应尔。

【子曰：“出则事公卿，入则事父兄，丧事不敢不勉，不为酒困，何有于我哉？”】

【禅解】

不要看得此四事容易，若看得容易，便非孔子。

【子在川上，曰：“逝者如斯夫！不舍昼夜。”】

【禅解】

此叹境也，即叹观也。盖天地万物，何一而非“逝者”？但愚人于此，计断计常。今既谓之“逝者”，则便非常；又复如斯“不舍昼夜”，则便非断。非断非常，即缘生正观。引而申之，有逝逝，有逝不逝；有不逝逝，有不逝不逝，非天下之至圣，孰能知之？

【子曰：“吾未见好德如好色者也。”】

【禅解】

惟颜子好学，亦惟颜子好德耳！

【子曰：“譬如为山，未成一簣，止，吾止也；譬如平地，虽覆一簣，进，吾往也。”】

【子曰：“语之而不惰者，其回也与！”】

【禅解】

后一念而方领解，即是惰；先一念而预相迎，亦是惰。如空谷受声，干土受润，大海受雨，明镜受像，随语随纳，不将不迎，方是“不惰”。

【子谓颜渊，曰：“惜乎！吾见其进也，未见其止也。”】

【禅解】

“进”是下手，“止”是归宿。正在学地，未登“无学”，奈何便死？真实可惜。

【子曰：“苗而不秀者有矣夫！秀而不实者有矣夫！”】

【禅解】

令人惕然深省。

【子曰：“后生可畏，焉知来者之不如今也？四十、五十而无闻焉，斯亦不足畏也已。”】

【禅解】

今日立志，后来满其所期，所以“可畏”。四十、五十而不闻道，不能酬今所立之志，则越老越不如后生矣。大凡学道之人，只是不负初心所期，便为大妙，故不必胜今，只须如今，便“可畏”耳。

【子曰：“法语之言，能无从乎？改之为贵。巽与之言，能无说乎？绎之为贵。说而不绎，从而不改，吾末如之何也已矣。”】

【禅解】

卓吾云：“与”字最妙，即以“法语之言”，“巽与之言”耳。舍“法”，便无以正人。后三语深望其“改”与“绎”也。

【子曰：“主忠信，毋友不如己者，过则勿惮改。”】

【子曰：“三军可夺帅也，匹夫不可夺志也。”】

【禅解】

卓吾云：三军夺帅，亦非易事。借此以极其形容耳。

【子曰：“衣敝缊袍，与衣狐貉者立，而不耻者，其由也与？‘不忮不求，何用不臧？’”子路终身诵之。子曰：“是道也，何足以臧？”】

【禅解】

《诗》之妙，在一“用”字。夫子说子路之病，在一“足”字。“用”则日进，“足”则误谓到家，不知正是道途边事耳。

【子曰：“岁寒，然后知松柏之后雕也。”】

【禅解】

王安石诗云：周公吐握勤劳日，王莽谦恭下士时，假使当年身便死，一生真伪有谁知？可与此节书作注脚。

【子曰：“知者不惑，仁者不忧，勇者不惧。”】

【禅解】

卓吾曰：使人自考。

方外史曰：三个“者”字，只是一人，不是三个人也。

【子曰：“可与共学，未可与适道；可与适道，未可与立；可与立，未可与权。”】

【禅解】

连说三个“未可”，正要他勉到“可”处。

【“唐棣之华，偏其反而。岂不尔思？室是远而。”子曰：“未之思也，夫何远之有？”】

【禅解】

此与“思无邪”一语参看，便见“兴”于《诗》的真正学问。亦可与佛门中念佛三昧作注脚。

卓吾云：人之所以异于禽兽，全在“思”；人之所以可为圣贤，全在“思”，故力为辩之，不但为一诗翻案而已。

乡党第十

【孔子于乡党，恂恂如也，似不能言者。其在宗庙朝廷，便便言，唯谨尔。朝，与下大夫言，侃侃如也；与上大夫言，誾誾如也。君在，蹐蹐如也。与与如也。君召使摈，色勃如也，足躩如也。揖所与立，左右手。衣前后，檐如也。趋进，翼如也。宾退，必复命曰：“宾不顾矣。”入公门，鞠躬如也，如不容。立不中门，行不履闕。过位，色勃如也，足躩如也，其言似不足者。摄齐升堂，鞠躬如也，屏气似不息者。出，降一等，逞颜色，怡怡如也。没阶趋，翼如也。复其位，蹐蹐如也。执圭，鞠躬如也，如不胜。上如揖，下如授。勃如战色，足缩缩，如有循。享礼，有容色。私覿，愉愉如也。】

【禅解】

上阶“如揖”，身微俯也。下阶“如授”，身稍直也。

【君子不以绀緌饰。红紫不以为褻服。当暑，袗絺綌，必表而出之。缁衣羔裘，素衣麕裘，黄衣狐裘。褻裘长。短右袂。必有寝衣，长一身有半。】

【禅解】

吴建先曰：寝衣，即被也。被“长一身有半”，则可。若别作衣，著之而寝，如此之长，如何起止？甚为可笑。或曰：寝衣只有半身长，如今人所作短衫也。亦通。

【狐貉之厚以居。去丧，无所不佩。非帷裳，必杀之。羔裘玄冠不以吊。吉月，必朝服而朝。齐，必有明衣，布。齐，必变食，居必迁坐。食不厌精，脍不厌细。】

【禅解】

但云：“不厌”耳，非刻意求“精”、“细”也。

【食饔而餲，鱼馁而肉败，不食。色恶，不食。臭恶，不食。失饪，不食。不时，不食。割不正，不食。不得其酱，不食。】

【禅解】

“色恶”，即今所谓落色，如黑鱼犬鳖之类。“臭恶”，即葱韭蒜等。“割不正”，谓不当杀而杀，或非分，或非时也。“不得其酱”，恐致伤人，故皆“不食”。

【肉虽多，不使胜食气。惟酒无量，不及乱。】

【禅解】

生得如此好酒量，尚以不为酒因为愧，可见禹恶旨酒，佛门戒酒，方是正理。济颠林酒仙之属，一时权变，不可为典要也”。

【沽酒市脯，不食。】

【禅解】

只是不坐在酒店、饭店中饮食耳。难道他请孔子，定要自做酒，自杀牲？

【不撤姜食。不多食。祭于公，不宿肉。祭肉不出三日。出三日，不食之矣。食不语，寝不言。虽疏食菜羹，瓜祭，必齐如也。】

【席不正，不坐。】

【禅解】

“不正”，谓不依长幼尊卑之叙。

【乡人饮酒，杖者出，斯出矣。乡人傺，朝服而立于阼阶。】

【禅解】

亦是爱礼极思。

【问人于他邦，再拜而送之。康子馈药，拜而受之。曰：“丘未达，不敢尝。”厩焚。子退朝，曰：“伤人乎？”不问马。君赐食，必正席先尝之；君赐腥，必熟而荐之；君赐生，必畜之。侍食于君，君祭，先饭。疾，君视之，东首，加朝服，拖绅。君命召，不俟驾行矣。入太庙，每事问。朋友死，无所归。曰：“于我殡。”朋友之馈，虽车马，非祭肉，不拜。】

【寝不尸，居不容。】

【禅解】

吉祥而卧，故“不尸”

【见齐衰者，虽狎，必变。见冕者与瞽者，虽褻，必以貌。凶服者式之。式负版者

。有盛饌，必变色而作。迅雷风烈，必变。升车，必正立执绥。车中，不内顾，不疾言，不亲指。色斯举矣，翔而后集。曰：“山梁雌雉，时哉！时哉！”子路共之，三嗅而作。】

【禅解】

也是实事，也是表法，只一“时哉！时哉！”四字，便将《乡党》一篇血脉收尽。而实从“时习”中来，故得时措之宜，名为时中之圣也。

三鸣而作，正“色斯举矣”之证。正举集皆时之验。雉者，“文明”之物。雌者，“述而不作”之象。“山梁”者，既非庙堂，亦非穷谷，乃不行于天下，而行于后世之象。

按《家语》，孔子尝自筮，而得《贲卦》，愀然有不平之状，谓丹漆不文，白玉不雕，质有余则不受饰。今《贲》非吾兆，以其饰也。盖孔于是的，“易学”未精耳，后于《杂卦传》云：贲，无色也。则得之矣。“离”为雉，“艮”为山，故云“山梁雌雉，时哉！时哉！”

先进第十一

【子曰：“先进于礼乐，野人也；后进于礼乐，君子也。如用之，则吾从先进。”】

【禅解】

“先进”的确有“野人”气象，“后进”的确是“君子”气象，但“君子”的确不如“野人”，故评论须如此，用之须如彼。

【子曰：“从我于陈、蔡者，皆不及门也。”德行：颜渊，闵子骞，冉伯牛，仲弓。言语：宰我，子贡。政事：冉有，季路。文学：子游，子夏。】

【禅解】

陈曼昭曰：夫子寻常不喜言语，故或云“文莫吾犹人也”，或云“焉用佞”，或云“予欲无言，乃教人”，何以仍立“言语”一科耶？盖空言，则非圣人制所取；而有益之言，可裨于世道，可发明至理者，又不可废也。圣门第一能言，莫若宰我，于“井有仁章”，及“三年丧章”见之。第二能言，莫若子贡，于“足食足兵章”见之。皆有关于世道人心之甚者也。

【子曰：“回也非助我者也，于吾言无所不说。”】

【禅解】

人问王阳明日：“圣人果以相助望门弟子否？阳明日：亦是实话。此道本无穷尽，问难愈多，则精微愈显。圣人之言，本是周遍，但有问难的人，胸中窒碍，圣人被他一难，发挥得愈加精神。若颜子胸中了然，如何得问难？故圣人亦寂然不动，无所发挥。

【子曰：“孝哉闵子骞！人不间于其父母昆弟之言。”】

【禅解】

从他格亲苦心处表出。

【南容三复白圭，孔子以其兄之子妻之。】

【季康子问：“弟子孰为好学？”孔子对曰：“有颜回者好学，不幸短命死矣！今

也则亡。”】

【禅解】

说了又说，深显曾子、子思，不能传得出世道脉。

【颜渊死，颜路请子之车以为之椁。子曰：“才不才，亦各言其子也。鲤也死，有棺而无椁。吾不徒行以为之椁。以吾从大夫之后，不可徒行也。”】

【禅解】

颜路只是一个流俗知见，如何做得回的父亲。

【颜渊死。子曰：“噫！天丧予！天丧予！”】

【颜渊死，子哭之恸。从者曰：“子恸矣。”曰：“有恸乎？非夫人之为恸而谁为！”】

【禅解】

朝闻夕死，夫复何憾？只是借以显道脉失传，杜后儒之冒认源流耳。若作孔子真如此哭，则呆矣。

【颜渊死，门人欲厚葬之，子曰：“不可。”门人厚葬之。子曰：“回也视予犹父也，予不得视犹子也。非我也，夫二三子也。”】

【禅解】

卓吾云：不是推干系。

方外史曰：孔子待回厚到底，后之欲厚其子弟者思之。

【季路问事鬼神。子曰：“未能事人，焉能事鬼？”敢问死。曰：“未知生，焉知死？”】

【禅解】

季路看得死生是两橛，所以认定人鬼亦是两事。子乙子了知十法界不出一心，生死那有二致，正是深答子路处。程子之言，颇得之。

【闵子侍侧，闇闇如也；子路，行行如也；冉有、子贡，侃侃如也。子乐。“若由也，不得其死然。”】

【鲁人为长府。闵子骞曰：“仍旧贯，如之何？何必改作？”子曰：“夫人不言，言必有中。”】

【禅解】

卓吾云：劝鲁人也，非赞闵子也。

【子曰：“由之瑟奚为于丘之门？”门人不敬子路。子曰：“由也升堂矣，未入于室也。”】

【禅解】

收之由“升堂”，拣之则门外，可参。

【子贡问：“师与商也孰贤？”子曰：“师也过，商也不及。”曰：“然则师愈与？”子曰：“过犹不及。”】

【禅解】

卓吾云：“然则师愈，”子贡却呈自己供状。“过犹不及”，夫子亦下子贡钳锤。

【季氏富于周公，而求也为之聚敛而附益之。子曰：“非吾徒也。小子鸣鼓而攻之，可也。”】

【禅解】

卓吾云：攻求，正所以攻季氏。

【柴也愚，参也鲁，师也辟，由也喭。】

【禅解】

卓吾云：识得病，便是药。

【子曰：“回也其庶乎，屡空。赐不受命，而货殖焉，亿则屡中。”】

【禅解】

凡夫受命所缚，贤人能不受命，惟圣人真学问，则知命，而不必转命。是故有志为圣人者，只须俟命。

今直以“屡空”二字，传颜子之种，作子贡之药。子贡一生，吃了“亿则屡中”之亏，便不受命，而货不觉其自殖矣。

【子张问善人之道。子曰：“不践迹，亦不入于室。”】

【禅解】

此须四句料拣，一“践迹”而“入室”，君子也。二“不贱迹”而“入室”，圣人也。三“不践迹”而“不入室”，善人也。四“践迹”“不入室”，有恒也。

【子曰：“论笃是与，君子者乎？色庄者乎？”】

【禅解】

不但教人勘他，亦是要人自勘。

【子路问：“闻斯行诸？”子曰：“有父兄在，如之何其闻斯行之？”冉有问：“闻斯行诸？”子曰：“闻斯行之。”公西华曰：“由也问闻斯行诸，子曰‘有父兄在’；求也问闻斯行诸，子曰‘闻斯行之’。赤也惑，敢问。”子曰：“求也退，故进之；由也兼人，故退之。”】

【禅解】

卓吾云：赤原不问由、求，还问赤耳。

方外史曰：答由、求，即是答赤。

【子畏于匡，颜渊后。子曰：“吾以女为死矣。”曰：“子在，回何敢死？”】

【禅解】

卓吾云：“吾以汝为死”，惊喜之辞。子在，回何敢死？”谁人说得出？

方外史曰：“悟此，方知圣人不必恸哭，又知圣人必须假装恸哭。

【季子然问：“仲由、冉求可谓大臣与？”子曰：“吾以子为异问，曾由与求之问。所谓大臣者：以道事君，不可则止。今由与求也，可谓具臣矣。”曰：“然则从之者与？”子曰：“弑父与君，亦不从也。”】

【禅解】

字字铁钺，足使子然丧魄。

【子路使子羔为费宰。子曰：“贼夫人之子。”子路曰：“有民人焉，有社稷焉。何必读书，然后为学？”子曰：“是故恶夫佞者。”】

【禅解】

夫子元不责子羔不读书，子路那得知之？

【子路、曾皙、冉有、公西华侍坐。子曰：“以吾一日长乎尔，毋吾以也。居则曰：‘不吾知也！’如或知尔，则何以哉？”】

【禅解】

圣贤心事，虽隐居求志，而未尝置天下于度外；虽遑遑汲汲，而未尝横经济于胸中。识得此意，方知禹、稷、颜子，易地皆然。奈四子各见一边，终不能知孔子行处，故因此“侍坐”，巧用钳锤，以曾点之病，为三子之药，又以三子之病，为曾点之药也。

【子路率尔而对曰：“千乘之国，摄乎大国之间，加之以师旅，因之以饥馑；由也为之，比及三年，可使有勇，且知方也。”夫子哂之。】

【禅解】

子路说的句句不虚，又且高兴热闹，所以夫子为之抚掌大笑。

袁了凡曰：《礼》云：笑不至矧。矧，与“哂”同，露龈大笑也。居丧，则笑不至矧。今言志时，闻此畅谈，何妨大笑？若注云：微笑，则成尖酸气象矣。

【“求！尔何如？”对曰：“方六七十，如五六十，求也为之，比及三年，可使足民。如其礼乐，以俟君子。”“赤！尔何如？”对曰：“非曰能之，愿学焉。宗庙之事，如会同，端章甫，愿为小相焉。”“点！尔何如？”鼓瑟希，铿尔，舍瑟而作。对曰：“异乎三子者之撰。”子曰：“何伤乎？亦各言其志也。”曰：“莫春

者，春服既成。冠者五六人，童子六七人，浴乎沂，风乎舞雩，咏而归。”夫子喟然叹曰；“吾与点也！”】

【禅解】

“铿尔”者，舍瑟之声；此非与点，乃借点以化三子之执情耳。

【三子者出，曾皙后。曾皙曰：“夫三子者之言何如？”子曰：“亦各言其志也已矣。”曰：“夫子何哂由也？”曰：“为国以礼，其言不让，是故哂之。”“唯求则非邦也与？”“安见方六七十如五六十而非邦也者？”“唯赤则非邦也与？”“宗庙会同，非诸侯而何？赤也为之小，孰能为之大？”】

【禅解】

不哂其“为国”之事，特哂其“不让”之言耳。既说“为国”，又说“非邦也与”，正是与三子，以补点之虚证。一直皆夫子之言，不是一问一答也。

颜渊第十二

【颜渊问仁，(僧问和尚，如何是佛)子曰：“克己复礼为仁。一日克己复礼，天下归仁焉。为仁由己，而由人乎哉？”(和尚答曰：只你便是。)颜渊曰：“请问其目。”(僧又问曰：如何保任？)子曰：“非礼勿视，非礼勿听，非礼勿言，非礼勿动。”(和尚答曰：一翳在目，空华乱坠。)颜渊曰：“回虽不敏，请事斯语矣。”(僧礼拜。)]

【禅解】

“克”，能也。能自己“复礼”，即名为“仁”。一见仁体，则天下正当下消归仁体，别无仁外之天下可得。犹云十方虚空，悉皆消殒，尽大地是个自己也，故曰“由己”。由己，正即克己，“己”字，不作两解。

夫子此语，分明将仁体和盘托出，单被上根，所以颜子顿开妙悟，只求一个人华屋之方便，故云“请问其目？”目者，眼目，譬如画龙，须点睛耳。所以夫子直示下手工夫，正所谓流转生死，安乐涅槃，惟汝六根，更非他物。视、听、言、动，即六根之用，即是自己之事，非教汝不视、不听、不言、不动，只要拣去“非礼”，便即是礼，礼复，则仁体全矣。

古云：但有去翳法，别无与明法。《经》云：知见立知，即无明本。知见未见，斯即涅槃？。立知，即是“非礼”。今“勿视”、“勿言”、“勿动”，即是知见未见也。此事人人本具，的确不由别人。只贵直下承当，有何利钝可论，故曰“回虽不敏，请事斯语。”从此三月不违，进而未止，方名“好学”，岂曾子、子思所能及哉！

【仲弓问仁。子曰：“出门如见大宾，使民如承大祭。己所不欲，勿施于人。在邦无怨，在家无怨。”仲弓曰：“雍虽不敏，请事斯语矣。”】

【禅解】

“出门”四句，即是“非礼”勿“视”、“听”、“言”、“动”之意。邦家“无怨”，即是“天下归仁”之意。但为中根人说，便说得浅近些，使其可以承当。

卓吾云：“出门”二句，即“居敬”也。“己所”二句，即“行简”也。“在邦”二句，即“以临其民，不亦可乎”也。

王阳明曰：亦只是自家“无怨”，如不怨天，不尤人之意。

【司马牛问仁。子曰：“仁者其言也讱。”曰：“其言也讱，斯谓之仁已乎？”子曰：“为之难，言之得无讱乎？”】

【禅解】

“其言也讱”，不是切言，全从仁者二字来，直是画出一个“仁者行乐图”。牛乃除却“仁者”二字，只说“其言也讱”，便看得容易了，故即以“为之难”三字药之。

【司马牛问君子。子曰：“君子不忧不惧。”曰：“不忧不惧，斯谓之君子已乎？”子曰：“内省不疚，夫何忧何惧？”】

【禅解】

不从“君子”二字上悟出“不忧不惧”根源，便是不“内省”处。

【司马牛忧曰：“人皆有兄弟，我独亡。”子夏曰：“商闻之矣：死生有命，富贵在天。君子敬而无失，与人恭而有礼。四海之内，皆兄弟也。君子何患乎无兄弟也？”】

【禅解】

卓吾云：牛多言而躁，兄又凶顽不道，料必不相容者，故忧其将害己也。子夏以‘死生有命’慰之，又教以处之之法，谓只待以恭敬，疏者可亲，况亲者乃反疏乎？盖劝其兄弟和睦也。

【子张问明。子曰：“浸润之谮，肤受之愬，不行焉。可谓明也已矣。浸润之谮肤受之愬不行焉，可谓远也已矣。”】

【禅解】

一指能蔽泰山，不受一指之蔽，则旷视六合矣。

【子贡问政。子曰：“足食。足兵。民信之矣。”子贡曰：“必不得已而去，于斯三者何先？”曰：“去兵。”子贡曰：“必不得已而去，于斯二者何先？”曰：“去食。自古皆有死，民无信不立。”】

【禅解】

陈曼昭曰：假饶积粟巨万，岂名“足食”，使菽粟如水火，方名“足食”耳。假饶拥众百万，岂名“足兵”，如周武王观兵于孟津，诸侯不期而会者八百，方名“足兵”耳。“足食，足兵”，民乃“信之”，则“去食”、“去兵”，民亦“信之”矣。今时要务，正在去兵去食，不在调兵征粮也。

方外史曰：蠲赋税。以足民食；练土著，以足民兵，故“民信之。”必不得已而去兵，去官兵，正所以足民兵也。又不得已而去食，去官食，正所以足民食也。所以效死而民弗去。今时不得已则屯兵，兵屯，而益不足矣。又不得已则加税，税加而益不足矣。求无乱亡，得乎？圣贤问答，真万古不易之良政也。又曰：既已死矣，且道有信，立个甚么？若知虽死而立，方知朝闻夕死可矣，不是死而后已矣的。

【棘子成曰：“君子质而已矣，何以文为？”】

【禅解】

有激之言，快心之论，不可无一，不可有二。

【子贡曰：“惜乎！夫子之说，君子也。驷不及舌。文犹质也，质犹文也。虎豹之鞟，犹犬羊之鞟。”】

【禅解】

“文”，也是皮肤上事；“质”，也是皮肤上事，须要知“文”、“质”从何处发生出来。譬如活虎豹，活犬羊，总是活的，若“虎豹之鞟”，“犬羊之鞟”，总是死货耳。子贡一生说话，只有此二句，大似悟的，可与“文质彬彬章”参看。

【哀公问于有若曰：“年饥，用不足，如之何？”有若对曰：“盍彻乎？”曰：“二，吾犹不足，如之何其彻也？”对曰：“百姓足，君孰与不足？百姓不足，君孰与足？”】

【禅解】

格言良策，万古不刊。当与“去食、去兵章”刻于宫殿。

【子张问崇德、辨惑。子曰：“主忠信，徙义，崇德也。”】

【禅解】

能“主”，方能“徙”，不能“徙”，便是“无主”。

【“爱之欲其生，恶之欲其死。既欲其生，又欲其死，是惑也。”】

【禅解】

四个“其”字，正显所爱所恶之境，皆自心所变现耳。同是自心所现之境，而“爱欲其生”、“恶欲其死”，所谓“自心取自心，非幻成幻法”也，非惑而何？

【“诚不以富，亦只以异。”（宜在“有马千驷章”“其斯之谓与”上。）】

【齐景公问政于孔子。孔子对曰：“君君，臣臣，父父，子子。”公曰：“善哉！信如君不君，臣不臣，父不父，子不子，虽有粟，吾得而食诸？”】

【子曰：“片言可以折狱者，其由也与？”子路无宿诺。】

【子曰：“听讼，吾犹人也，必也使无讼乎！”】

【子张问政。子曰：“居之无倦，行之以忠。”】

【禅解】

不曰“行无倦，居以忠”，便见合外内之道。

【子曰：“博学于文，约之以礼，亦可以弗畔矣夫！”】

【子曰：“君子成人之美，不成人之恶。小人反是。”】

【禅解】

请各各自思之。

【季康子问政于孔子。孔子对曰：“政者，正也。子帅以正，孰敢不正？”】

【季康子患盗，问于孔子。孔子对曰：“苟子之不欲，虽赏之不窃。”】

【季康子问政于孔子曰：“如杀无道，以就有道，何如？”孔子对曰：“子为政，焉用杀？子欲善，而民善矣。君子之德风，小人之德草。草上之风，必偃。”】

【禅解】

三节都提出一个“子”字，正君子求诸己，乃端本澄源之论。

【子张问：“士何如斯可谓之达矣？”子曰：“何哉，尔所谓达者？”子张对曰：“在邦必闻，在家必闻。”子曰：“是闻也，非达也。夫达也者，质直而好义，察言而观色，虑以下人。在邦必达，在家必达。夫闻也者，色取仁而行违，居之不疑。在邦必闻，在家必闻。”】

【禅解】

真正好先生，金沙不滥，药病灼燃。

【樊迟从游于舞雩之下，曰：“敢问崇德、修慝、辨惑。”先事后得，非崇德与？攻其恶，无攻人之恶，非修慝与？一朝之忿，忘其身，以及其亲，非惑与？”】

【樊迟问仁。子曰：“爱人。”问知。子曰：“知人。”樊迟未达。子曰：“举直错诸枉，能使枉者直。”樊迟退，见子夏。曰：“乡也吾见于夫子而问知，子曰，‘举直错诸枉，能使枉者直’，何谓也？”子夏曰：“富哉言乎！舜有天下，选于众，举皋陶，不仁者远矣。汤有天下，选于众，举伊尹，不仁者远矣。”】

【子贡问友。子曰：“忠告而善道之，不可则止，无自辱焉。”】

【禅解】

“自辱”则反带累朋友，所以不可。若知四悉随机，方可自利利他。

【曾子曰：“君子以文会友，以友辅仁。”】

【禅解】

为莲故华“以文会友”也。华开莲现“以友辅仁”也。

子路第十三

【子路问政。子曰：“先之，劳之。”请益。曰：“无倦。”】

【禅解】

“先”、“劳”，并去声呼之。“先之”，创其始也。“劳之”，考其终也。“无倦”，精神贯彻于终始也。

卓吾云：“请益”处便是倦根，故即以“无倦”益之。

【仲弓为季氏宰，问政。子曰：“先有司，赦小过，举贤才。”曰：“焉知贤才而举之？”曰：“举尔所知。尔所不知，人其舍诸？”】

【禅解】

仲弓独问举贤才，可谓知急先务。

【子路曰：“卫君待子而为政，子将奚先？”子曰：“必也正名乎！”子路曰：“有是哉，子之迂也！奚其正？”子曰：“野哉！由也。君子于其所不知，盖阙如也。名不正，则言不顺；言不顺，则事不成；事不成，则礼乐不兴；礼乐不兴，则刑罚不中；刑罚不中，则民无所措手足。故君子名之必可言也，言之必可行也。君子于其言，无所苟而已矣。”】

【禅解】

人问王阳明曰：孔子正名，先儒说上告天子，下告方伯，废辄立郢，此意如何？

阳明答曰：恐难如此。岂有此人致敬尽礼，待我为政，我就先去废他，岂人情天理耶！孔既肯与辄为政，必辄已能倾心委国而听。圣人盛德至诚，必已感化卫辄，使知无父之不可以为人，必将痛哭奔走，往迎其父。父子之爱，本于天性，辄能痛悔，真切如此，蒯瞶岂不感动底豫。蒯瞶既还，辄乃致国请戮。瞶已见化于子，又有孔子至诚调和其间，当亦决不肯受，仍以命辄，群臣百姓又必欲得辄为君。辄乃自暴其罪恶请于天子，告于方伯诸侯，而必欲致国于父。瞶与群臣百姓，亦皆表辄悔悟仁孝之美，请于天子，告于方伯诸侯，必欲得辄为君。于是集命于辄，使之复君卫国，辄不得已，乃如后世上皇故事，尊瞶为太公，备物致养而始自复其位。则君君，臣臣，父父，子子，名正言顺，一举而可为政于天下矣。孔子“正名”或是如此。

【樊迟请学稼，子曰：“吾不如老农。”请学为圃。曰：“吾不如老圃。”樊迟出。子曰：“小人哉，樊须也！上好礼，则民莫敢不敬；上好义，则民莫敢不服；上好信，则民莫敢不用情。夫如是，则四方之民襁负其子而至矣，焉用稼？”】

【禅解】

宁为提婆达多，不为声闻缘觉，非大人，何以知此？

【子曰：“诵诗三百，授之以政，不达；使于四方，不能专对；虽多，亦奚以为？”】

【禅解】

诵《诗》者思之。

【子曰：“其身正，不令而行；其不正，虽令不从。”】

【子曰：“鲁卫之政，兄弟也。”】

【子谓卫公子荆，“善居室。始有，曰：‘苟合矣。’少有，曰：‘苟完矣。’富有，曰：‘苟美矣。’”】

【子适卫，冉有仆。子曰：“庶矣哉！”冉有曰：“既庶矣。又何加焉？”曰：“富之。”曰：“既富矣，又何加焉？”曰：“教之。”】

【禅解】

卓吾曰：一车问答，万古经纶。

【子曰：“苟有用我者。期月而已可也，三年有成。”】

【禅解】

者才不是说真方，卖假药的。

【子曰：“善人为邦百年，亦可以胜残去杀矣。诚哉是言也！”】

【禅解】

深痛杀业，深思善人。

【子曰：“如有王者，必世而后仁。”】

【禅解】

可见五浊，甚难化度。

【子曰：“苟正其身矣，于从政乎何有？不能正其身，如正人何？”】

【禅解】

不正身之人，难道不要正人耶？故以此提醒之。

【冉子退朝。子曰：“何晏也？”对曰：“有政。”子曰：“其事也。如有政，虽不吾以，吾其与闻之。”】

【禅解】

卓吾曰：“一字不肯假借如此。”

【定公问：“一言而可以兴邦，有诸？”孔子对曰：“言不可以若是其几也。人之言曰：‘为君难，为臣不易。’如知为君之难也，不几乎一言而兴邦乎？”曰：“一言而丧邦，有诸？”孔子对曰：“言不可以若是其几也。人之言曰：‘予无乐乎为君，唯其言而莫予违也。’如其善而莫之违也，不亦善乎？如不善而莫之违也，不几乎一言而丧邦乎？”】

【禅解】

四个“几”字一样看，皆是容易之意。”《传》曰：几者，动之微知几其神。可以参看。

【叶公问政。子曰：“近者说，远者来。”子夏为莒父宰，问政。子曰：“无欲速，无见小利。欲速，则不达；见小利，则大事不成。”】

【禅解】

观心者，亦当以此为箴。

【叶公语孔子曰：“吾党有直躬者，其父攘羊，而子证之。”孔子曰：“吾党之直者异于是。父为子隐，子为父隐，直在其中矣。”】

【禅解】

才有第二念起，便不直。此即菩萨不说四众过戒也。

【樊迟问仁。子曰：“居处恭，执事敬，与人忠。虽之夷狄，不可弃也。”】

【禅解】

也只是“克己复礼”，而变文说之。

【子贡问曰：“何如斯可谓之士矣？”子曰：“行己有耻，使于四方，不辱君命，可谓士矣。”曰：“敢问其次。”曰：“宗族称孝焉，乡党称弟焉。”曰：“敢问其次。”曰：“言必信，行必果，硁硁然小人哉！抑亦可以为次矣。”曰：“今之从政者何如？”子曰：“噫！斗筭之人，何足算也。”】

【禅解】

若人知有自己，便做不得无耻之行，此句便是士之根本。三节只是前必具后，后不具前耳。子贡从来不识自己，所以但好做个瑚琏。虽与“斗筭”贵贱不同，同一器皿而已。

卓吾云：孝弟，都从有耻得来；“必信”，“必果”也，只为不肯“无耻”。今之从政者只是一个“无耻。”

【子曰：“不得中行而与之，必也狂狷乎！狂者进取，狷者有所不为也。”】

【禅解】

“狂狷”，就是狂简。狂则必简，简即“有所不为”，有所不为，只是“行己有耻”耳。孟子分作两人解释，孔子不分作两人也。若狂而不狷，狷而不狂，有何可取？

【子曰：“南人有言曰：‘人而无恒，不可以作巫医。’善夫！”“不恒其德，或承之羞。”子曰：“不占而已矣。”】

【禅解】

观象玩占之人，决不“无恒”。无恒，即是无耻。

【子曰：“君子和而不同，小人同而不和。”】

【禅解】

无诤，故“和”。知差别法门，故“不同”。情执是“同”，举一废百，故“不和”。

【子贡问曰：“乡人皆好之，何如？”子曰：“未可也。”“乡人皆恶之，何如？”子曰：“未可也。不如乡人之善者好之，其不善者恶之。”】

【禅解】

“不善者恶”，正是好处，何必怪他不善者之恶耶？

【子曰：“君子易事而难说也：说之不以道，不说也；及其使人也，器之。小人难事而易说也：说之虽不以道，说也；及其使人也，求备焉。”】

【禅解】

君子悦道，悦即非悦；小人好悦，道即非道。

【子曰：“君子泰而不骄，小人骄而不泰。”】

【禅解】

“泰”故“坦荡荡”，从戒慎恐惧来。“骄”故“长戚戚”，从无忌惮求。

【子曰：“刚、毅、木、讷，近仁。”】

【禅解】

不是质近乎仁，只是欲依于仁者，须如此下手耳。

卓吾云：刚、毅、木、讷都是仁。仁，则并无刚、毅、木、讷矣。

【子路问曰：“何如斯可谓之士矣？”子曰：“切切、偲偲、怡怡如也，可谓士矣。朋友切切、偲偲，兄弟怡怡。”】

【禅解】

卓吾云：兄弟易“切切，思思”，朋友易“怡怡”，故分别言之。

【子曰：“善人教民七年，亦可以即戎矣。”】

【禅解】

卓吾云：说七年，便不是空话。

【子曰：“以不教民战，是谓弃之。”】

【禅解】

仁人之言，惻然可思。

宪问第十四

【宪问耻。子曰：“邦有道，谷；邦无道，谷，耻也。”】

【禅解】

卓吾曰：原思辞禄，欲脱其身于“谷”之外。孔子耻谷”。欲效其身子“谷”之中。

方外史曰：若知素位而行。便不肯脱身“谷”外。

【“克、伐、怨、欲不行焉，可以为仁矣？”子曰：“可以为难矣，仁则吾不知也。”】

【禅解】

为仁，决不是着样工夫。

【子曰：“士而怀居，不足以为士矣。”】

【禅解】

得少为足，便是怀居，与“不知老之将至”相反。

【子曰：“邦有道，危言危行；邦无道，危行言孙。”】

【禅解】

“言逊”，不是避祸，正是挽回世运之妙用耳。

【子曰：“有德者必有言，有言者不必有德；仁者必有勇，勇者不必有仁。”】

【禅解】

有见地者，必有行履。有行履者，不必有见地。故古人云：只贵见地，不问行履也。倘无行履，决非正见。

【南宫适问于孔子曰：“羿善射，奭荡舟，俱不得其死然；禹稷躬稼，而有天下。”夫子不答，南宫适出。子曰：“君子哉若人！尚德哉若人！”】

【禅解】

千古至言，文不加点，故“不答”也。出后而赞，正是不答处。不答，又就是赞处。

【子曰：“君子而不仁者有矣夫，未有小人而仁者也。”】

【禅解】

警策君子，激发小人。小人若仁，便是君子，那有定名。

【子曰：“爱之，能勿劳乎？忠焉，能勿诲乎？”】

【子曰：“为命：裨谌草创之，世叔讨论之，行人子羽修饰之，东里子产润色之。”】

【禅解】

作文要诀。

【或问子产。子曰：“惠人也。”问子西。曰：“彼哉！彼哉！”问管仲。曰：“人也。夺伯氏骍邑三百，饭疏食，没齿无怨言。”】

【子曰：“贫而无怨难，富而无骄易。”】

【禅解】

无怨就是乐。

【子曰：“孟公绰为赵魏老则优，不可以为滕薛大夫。”】

【子路问成人。(卓吾云：切问。)]】

【子曰：“若臧武仲之知，公绰之不欲，卞庄子之勇，冉求之艺，文之以礼乐，亦可以为成人矣。”】

【禅解】

卓吾云：知、廉、勇、艺，是铜铁；礼、乐是丹头。

方外史曰：四子若能文之以礼、乐，则四子便各各成人，非要兼四子之长也。礼是此心之节文，乐是此心之太和，诚于中而形于外，故名为文，非致饰于外也。

【曰：“今之成人者何必然？见利思义，见危授命，久要不忘平生之言，亦可以为成人矣。”】

【禅解】

此与得见有恒，抑亦可以为次之意同。

卓吾云：然则今之不成人者极多矣。

【子问公叔文子于公明贾曰：“信乎夫子不言、不笑、不取乎？”公明贾对曰：“以告者过也。夫子时然后言，人不厌其言；乐然后笑，人不厌其笑；义然后取，人不厌其取。”子曰：“其然，岂其然乎？”】

【禅解】

卓吾曰：是乐取之词，非猜疑之语。

方外史曰：圣人见人之善，如己之善，与后儒自是不同。

【子曰：“臧武仲以防求为后于鲁，虽曰不要君，吾不信也。”】

【子曰：“晋文公谲而不正，齐桓公正而不谲。”】

【子路曰：“桓公杀公子纠，召忽死之，管仲不死。”曰：“未仁乎？”子曰：“桓公九合诸侯，不以兵车，管仲之力也。如其仁！如其仁！”】

【禅解】

“不以兵车”。故“如其仁”，乃救刀兵劫之真心实话。

【子贡曰：“管仲非仁者与？桓公杀公子纠，不能死，又相之。”子曰：“管仲相桓公，霸诸侯，一匡天下，民至于今受其赐。微管仲，吾其被发左衽矣。岂若匹夫匹妇之为谅也，自经于沟渎而莫之知也。”】

【禅解】

大丈夫生于世间，惟以救民为第一义，小名小节，何足论也！天下后世受其赐，仁莫大焉。假使死节，不过忠耳，安得为仁？况又不必死者耶！当知召忽之死，特匹夫匹妇之谅而已矣。王珪、魏征，亦与管仲同是个人。若夫忠臣不事二君，烈女不更二夫，本非圣贤之谈，正是匹妇之谅，故《易辞》曰：桓其德，贞，妇人吉，夫子凶。”大丈夫幸思之。

卓吾云：因他谥文子，故曰可以为文。文字不必太泥。总之，极其许可之词。

【公叔文子之臣大夫僎，与文子同升诸公。子闻之曰：“可以为文矣。”】

【子言卫灵公之无道也，康子曰：“夫如是，奚而不丧？”孔子曰：“仲叔圉治宾客，祝鮀治宗庙，王孙贾治军旅。夫如是，奚其丧？”】

【禅解】

低低人尚有大用若此，况肯用圣贤者乎？

【子曰：“其言之不忤，则为之也难。”】

【禅解】

正要人忤。

【陈成子弑简公。孔子沐浴而朝，告于哀公曰：“陈恒弑其君，请讨之。”公曰：“告夫三子！”孔子曰：“以吾从大夫之后，不敢不告也。君曰‘告夫三子’者。”之三子告，不可。孔子曰：“以吾从大夫之后，不敢不告也。”】

【禅解】

陈恒三子，一齐讨矣。

【子路问事君。子曰：“勿欺也，而犯之。”】

【禅解】

不能阙疑，便是自欺，亦即欺君。

今之不敢犯君者，多是欺君者也。为君者喜欺，不喜犯，奈之何哉！

【子曰：“君子上达，小人下达。”】

【禅解】

形而上者谓之道，形而下者谓之器。“上达”故不器，“下达”故成瑚琏斗筭等器。若不成器者，并非小人。

【子曰：“古之学者为己，今之学者为人。”】

【禅解】

尽大地是个自己，所以度尽众生，只名为己。若见有己外之人可为，便非真正发菩提心者矣。

【蘧伯玉使人于孔子。孔子与之坐而问焉，曰：“夫子何为？”对曰：“夫子欲寡其过而未能也。”使者出。子曰：“使乎！使乎！”】

【禅解】

千古圣贤真学问，真血脉，不亿使者一言点出，真奇!真奇!

【子曰：“不在其位，不谋其政。”】

【曾子曰：“君子思不出其位。”】

【禅解】

末之思也，夫何远之有？正是思不出其位。

【子曰：“君子耻其言而过其行。”】

【禅解】

卓吾云：“耻”字何等精神，“过”字何等力量。

【子曰：“君子道者三，我无能焉：仁者不忧，知者不惑，勇者不惧。”子贡曰：“夫子自道也。”】

【禅解】

仁者、知者、勇者，三个“者”字，正与“道者”“者”字相应，所谓一心三德，不是三件也。夫子自省，真是未能。子贡看来，直是自道。譬如华严所明，十地菩萨，虽居因位，而下地视之，则如佛矣。

【子贡方人。子曰：“赐也贤乎哉？夫我则不暇。”】

【禅解】

“不暇”二字，顶门针也。若能思齐内省，则虽妍蕊立辨，不名为“方人”矣。

【子曰：“不患人之不己知，患其不能也。”】

【禅解】

何有于我哉！我无能焉，是吾忧也，则吾未之有得，皆患不能之真榜样也。

【子曰：“不逆诈，不亿不信。抑亦先觉者，是贤乎！”】

【禅解】

不惟拣去世间逆亿，亦复拣去二乘作意神通矣。

世人自多诈则恒“逆诈”，自多不信，则恒亿“不信”。圣人哀之，故进以“先觉”二字。若欲先觉，须从不诈、不疑、不逆、不亿下手，直到至诚地位，自然任运先觉。苟不向心地克己复礼，而作意欲求先觉，便是逆亿了也。故曰“君子可欺。”唯“可欺”，方为君子耳。

【微生亩谓孔子曰：“丘何为是栖栖者与？无乃为佞乎？”孔子曰：“非敢为佞也，疾固也。”】

【孔子曰：“非敢为佞也，疾固也。”】

【子曰：“骥不称其力，称其德也。”】

【禅解】

可以人而不如马乎？

【或曰：“以德报怨，何如？”子曰：“何以报德？以直报怨，以德报德。”】

【禅解】

达得怨亲平等，方是“直”。若见有怨，而强欲以德报之，正是人我是非未化处。“怨”宜忘，故报之以“直”，谓不见有“怨”也。“德”不可忘，故报之以“德”，谓知恩报恩也。

【子曰：“莫我知也夫！”子贡曰：“何为其莫知子也？”子曰：“不怨天，不尤人。下学而上达。知我者其天乎！”】

【禅解】

心外无天，故“不怨天”。心外无人，故“不尤人”。向上事须从向下会取，故‘下学而上达’。惟其下学上达，所以不怨不尤。今人离“下学”，而高谈“上达”，譬如无翅，妄拟腾空。

【公伯寮愬子路于季孙。子服景伯以告，曰：“夫子固有惑志于公伯寮，吾力犹能肆诸市朝。”子曰：“道之将行也与？命也。道之将废也与？命也。公伯寮其如命何！”】

【禅解】

子服眼中有伯寮，孔子了知伯寮不在子路命外。伯寮自谓想得子路，孔子了知子路之命差遣伯寮，可见圣贤眼界胸襟。

【子曰：“贤者辟世，其次辟地，其次辟色，其次辟言。”】

【禅解】

程子曰：四者非有优劣。所遇不同耳。

【子曰：“作者七人矣。”】

【子路宿于石门。晨门曰：“奚自？”子路曰：“自孔氏。”曰：“是知其不可而为之者与？”】

【禅解】

只此一语，描出孔子之神。盖知可而为者，伊尹、周公之类是也。知不可而不为者，伯夷、柳下惠等是也。知可而不为者，巢、许之类是也。知不可而为之者，孔子

是也。若不知可与不可者，不足论矣。

【子击磬于卫。有荷蕢而过孔氏之门者，曰：“有心哉！击磬乎！既而曰：“鄙哉！硠硠乎！莫己知也，斯己而已矣。深则厉，浅则揭。”子曰：“果哉！末之难矣。”】

【禅解】

既知音，亦知心，但不知木铎之意耳。“果哉！末之难”却与“知不可而为之”作一注脚，可谓难行能行。

【子张曰：“书云：‘高宗谅阴，三年不言。’何谓也？”子曰：“何必高宗，古之人皆然。君薨，百官总己以听于冢宰三年。”】

【禅解】

“古之人皆然”一句，伤今思古，惨甚痛甚。

【子曰：“上好礼，则民易使也。”】

【子路问君子。子曰：“修己以敬。”曰：“如斯而已乎？”曰：“修己以安人。”曰：“如斯而已乎？”曰：“修己以安百姓。修己以安百姓，尧舜其犹病诸！”】

【禅解】

尽十方世界是个自己，竖穷横遍，其体、其量、其具，皆悉不可思议。人与百姓，不过自己心中所现一毛头许境界耳。

子路只因不达自己，所以连用两个“如斯而已乎”，孔子见得“己”字透彻，所以说到“尧、舜犹病”，非病不能安百姓也，只病修己未到极则处耳。

【原壤夷俟。子曰：“幼而不孙弟，长而无述焉，老而不死，是为贼！”以杖叩其胫。】

【禅解】

以打骂作佛事。

【阙党童子将命。或问之曰：“益者与？”子曰：“吾见其居于位也，见其与先生并行也。非求益者也，欲速成者也。”】

【禅解】

为学日益，为道日损，人都看作两橛。若知“下学而上达”，则日益处，即日损处矣。今童子而居位并行，何等志气，但恐其离下学而求上达，便使依乎中庸之道，故令之将命，所以实其操履耳。

居位，即是欲立。并行，即是欲达。皆童子之所难能，故知不是仅“求益”者。

卓吾云：在居位并行处，见其“欲速成”，非不隅坐随行也。若不隅坐随行，一放牛小厮矣，何以“将命”？

卫灵公第十五

【卫灵公问陈于孔子。孔子对曰：“俎豆之事，则尝闻之矣；军旅之事，未之学也。”明日遂行。在陈绝粮，从者病，莫能兴。子路愠见曰：“君子亦有穷乎？”子曰：“君子固穷，小人穷斯滥矣。”】

【禅解】

只消“愠见”，便是“滥”。若知乐在其中，那见“有穷”可“愠”？

【子曰：“赐也，女以予为多学而识之者与？”对曰：“然，非与？”曰：“非也，予一以贯之。”】

【禅解】

卓吾云：腐儒谓“然，非与”处，不如曾子之“唯”可发一笑。

方外史曰：俗儒妄谓曾子传得孔子之道，则子贡亦传得孔子之道矣。孔子何以再叹“今也则立！”

【子曰：“由！知德者鲜矣。”】

【禅解】

痛下一针。

【子曰：“无为而治者，其舜也与？夫何为哉，恭己正南面而已矣。”】

【禅解】

从来圣贤，只有为人、为学、为德而已，断断无有为治者。若一有为治之心，则天下益乱矣。

“恭己”二字，即是修己以敬，又即为人、为学、为德之实工夫。

【子张问行。子曰：“言忠信，行笃敬，虽蛮貊之邦行矣；言不忠信，行不笃敬，虽州里行乎哉？立，则见其参于前也；在舆，则见其倚于衡也。夫然后行。”子张书诸绅。】

【禅解】

信而曰忠，敬而曰笃，对治子张病根也。“参前”、“倚衡”，但尽其忠信、笃敬耳，非以此求行也。惟不求行，夫然后行。

【子曰：“直哉史鱼！邦有道，如矢；邦无道，如矢。”君子哉蘧伯玉！邦有道，则仕；邦无道，则可卷而怀之。”】

【禅解】

春兰、秋菊，各擅其美。

【子曰：“可与言而不与之言，失人；不可与言而与之言，失言。知者不失人，亦不失言。”】

【禅解】

四悉檀。

【子曰：“志士仁人，无求生以害仁，有杀身以成仁。”】

【禅解】

如此，方名志士仁人。今之志士仁人，宜以此自勘。

【子贡问为仁。子曰：“工欲善其事，必先利其器。居是邦也，事其大夫之贤者，友其士之仁者。”】

【禅解】

贤之与仁，皆吾利器也，奈何钝置之耶？

【颜渊问为邦。子曰：“行夏之时，乘殷之辂，服周之冕，乐则韶舞。放郑声，远佞人。郑声淫，佞人殆。”】

【禅解】

王阳明曰：颜子具体圣人，其于为邦的大本大原，都已完备。夫子平日知之已深，到此都不必言，只就制度文为上说。此等处亦不可忽略，须要是如此方尽善。又不

可因自己本领是当了，便于防范上疏阔，须是要“放郑声，远佞人。”盖颜子是克己，向里德上用心的人。孔子恐其外面末节，或有疏略，故就他不足处帮补说。若在他处，须告以为政在人，取人以身，修身以道，修道以仁，达道九经，及诚身许多工夫，方始做得。此方是万世常行之道，不然，只去行了夏时，乘了殷辂，服了周冕。作了《韶舞》，天下岂便治得？

【子曰：“人无远虑，必有近忧。”】

【禅解】

未超三界外，总在五行中。断尽二障，虑斯远矣。

【子曰：“已矣乎！吾未见好德如好色者也。”】

【禅解】

正是不肯绝望。

【子曰：“臧文仲其窃位者与？知柳下惠之贤，而不与立也。”】

【禅解】

诛心在一“知”字。

【子曰：“躬自厚而薄责于人，则远怨矣。”】

【禅解】

厚责人者，只是不能“自厚”耳。

【子曰：“不曰‘如之何如之何’者，吾未如之何也已矣。”】

【禅解】

毕竟将如之何。

【子曰：“群居终日，言不及义，好行小慧，难矣哉！”】

【禅解】

小慧与义正相反。

【子曰：“君子义以为质，礼以行之，孙以出之，信以成之。君子哉！”】

【禅解】

“行之”，行此义也。“出之”，出此义也。“成之”，成此义也。

卓吾曰：不是以义为质，以礼行之，以孙出之，以信众之。

方外史曰：须向“君子”二字上著眼。

【子曰：“君子病无能焉，不病人之不已知也。”】

【子曰：“君子疾没世而名不称焉。”】

【禅解】

“称”字去声。“没世”而实德“不称”，君子之名，真可“疾”矣。

【子曰：“君子求诸己，小人求诸人。”】

【禅解】

识得自己，自然求己。小人只是不知自己耳，哀哉！

【子曰：“君子矜而不争，群而不党。”】

【禅解】

矜则易争，群则易党，故以“不争”、“不党”为诫勉。

【子曰：“君子不以言举人，不以人废言。”】

【禅解】

至明至公。

【子贡问曰：“有一言而可以终身行之者乎？”】

【子曰：“其恕乎！己所不欲，勿施于人。”】

【禅解】

可以于天下，可行于万世，真是一以贯之。

【子曰：“吾之于人也，谁毁谁誉？如有所誉者，其有所试矣。斯民也，三代之所以直道而行也。”】

【禅解】

人自谓在三代后，孔子视之，皆同于三代时。所以如来成正觉时，悉见一切众生成正觉。

【子曰：“吾犹及史之阙文也，有马者借人乘之。今亡矣夫！”】

【禅解】

不敢绝望。

【子曰：“巧言乱德，小不忍则乱大谋。”】

【禅解】

二皆自乱自己耳。

卓吾云：一失之浮，一失之躁。

【子曰：“众恶之，必察焉；众好之，必察焉。”】

【禅解】

上句为豪杰伸屈，下句为乡愿照胆。

【子曰：“人能弘道，非道弘人。”】

【禅解】

可见道，只是人之所具；天地万物，又只是道之所具，谁谓天地生人耶？

【子曰：“过而不改，是谓过矣。”】

【禅解】

为三种忏法作前茅。

【子曰：“吾尝终日不食，终夜不寝，以思，无益，不如学也。”】

【禅解】

学、思本非两事，言此，以救偏思之失耳。

【子曰：“君子谋道不谋食。耕也，馁在其中矣；学也，禄在其中矣。君子忧道不忧贫。”】

【禅解】

卓吾云：作训词看。

【子曰：“知及之，仁不能守之；虽得之，必失之。知及之，仁能守之。不庄以莅之，则民不敬。知及之，仁能守之，庄以莅之。动之不以礼，未善也。”】

【禅解】

“知及”、“仁守”是明明德，“庄以莅之”是亲民，“动之以礼”是止至善。不能“庄莅”、“动礼”便是仁守不全。不能仁守，便是知之未及。思之，思之，如来得三不护，方可名动之以礼，故曰：修己以敬，尧舜其犹病诸。

【子曰：“君子不可小知，而可大受也；小人不可大受，而可小知也。”】

【禅解】

“不可小知”，不可以思议测度之也。“可大受”，如大海能受龙王之雨，能受众流之归也。小人反是。

【子曰：“民之于仁也，甚于水火。水火，吾见蹈而死者矣，未见蹈仁而死者也。”】

【禅解】

既曰“未见蹈仁而死”，又曰“有杀身以成仁”，方信杀身不是死。

【子曰：“当仁不让于师。”】

【禅解】

见过于师，方堪传授。

卓吾云：只为学者，惟有“当仁”一事让师，故云。

【子曰：“君子贞而不谅。”】

【禅解】

“谅”，即径？小人。

【子曰：“事君，敬其事而后其食。”】

【禅解】

“敬其事”敬字，从敬止发来，既敬其事，必“后其食”矣。

【子曰：“有教无类。”】

【禅解】

佛菩萨之心也。若使有类，便无教矣。

【子曰：“道不同，不相为谋。”】

【禅解】

毫厘有差，天地悬隔，仁与不仁而已矣。

【子曰：“辞达而已矣。”】

【禅解】

从古有几个真正“达”的。

卓吾云：五字便是谈文秘密藏。

【师冕见，及阶，子曰：“阶也。”及席，子曰：“席也。”皆坐，子告之曰：“某在斯，某在斯。”师冕出。子张问曰：“与师言之道与？”子曰：“然。固相师之道也。”】

【禅解】

子张看得“道”字奇特，孔子注得“道”字平常。

季氏第十六

【季氏将伐颛臾。冉有、季路见于孔子曰：“季氏将有事于颛臾。”孔子曰：“求！无乃尔是过与？夫颛臾，昔者先王以为东蒙主，且在邦域之中矣，是社稷之臣也。何以伐为？”冉有曰：“夫子欲之，吾二臣者皆不欲也。”孔子曰：“求！周任有言曰：‘陈力就列，不能者止。’危而不持，颠而不扶，则将焉用彼相矣？且尔言过矣。虎兕出于柙，龟玉毁于椟中，是谁之过与？”冉有曰：“今夫颛臾，固而近于费。今不取，后世必为子孙忧。”孔子曰：“求！君子疾夫舍曰欲之，而必为之辞。丘也闻有国有家者，不患寡而患不均，不患贫而患不安。盖均无贫，和无寡，安无倾。夫如是，故远人不服，则修文德以来之。既来之，则安之。今由与求也，相夫子，远人不服而不能来也；邦分崩离析而不能守也。而谋动干戈于邦内。吾恐季孙之忧，不在颛臾，而在萧墙之内也。”】

【禅解】

老吏断狱，曲盲分明。

【孔子曰：“天下有道，则礼乐征伐自天子出；天下无道，则礼乐征伐自诸侯出。自诸侯出，盖十世希不失矣；自大夫出，五世希不失矣；陪臣执国命，三世希不失矣。天下有道，则政不在大夫。天下有道，则庶人不议。”】

【禅解】

卓吾云：明诛臣子，隐责君父。

【孔子曰：“禄之去公室，五世矣；政逮于大夫，四世矣；故夫三桓之子孙，微矣。”】

【孔子曰：“益者三友，损者三友。友直，友谅，友多闻，益矣。友便辟，友善柔，友便佞，损矣。”】

【孔子曰：“益者三乐，损者三乐。乐节礼乐，乐道人之善，乐多贤友，益矣。乐骄乐，乐佚游，乐宴乐，损矣。”】

【禅解】

“益者”、“损者”，都就求益招损的自身上说。

【孔子曰：“侍于君子有三愆：言未及之而言谓之躁，言及之而不言谓之隐，未见

颜色而言谓之瞽。”】

【孔子曰：“君子有三戒：少之时，血气未定，戒之在色；及其壮也，血气方刚，戒之在斗；及其老也，血气既衰，戒之在得。”】

【禅解】

有戒，则能御血气；无戒，则被血气使。一部《易经》，三戒收尽。

【孔子曰：“君子有三畏：畏天命，畏大人，畏圣人之言。小人不知天命而不畏也，狎大人，侮圣人之言。”】

【禅解】

天命之性，真妄难分，所以要畏。大人修道复性，是我明师良友，所以要畏。圣言指示修道复性之要，所以要畏。“畏天命”是归依一体、三宝，“畏大人”是归依住持、佛宝、僧宝，“畏圣人之言”是归依住持、法宝也。

不知“天命”，亦不知“大人”，亦不知“圣人之言”，小人既皆不知而不畏，则君子皆知，故皆畏耳。不知心、佛、众生三无差别，不知人心惟危，道心惟微，不能戒慎恐惧，是不畏天命。妄以理佛拟究竟佛，是“狎大人”。妄谓《经》、《论》是止啼法，不知慧命所寄，是“侮圣人之言”。

【孔子曰：“生而知之者，上也；学而知之者，次也；困而学之，又其次也；困而不学，民斯为下矣。”】

【禅解】

只是肯学，便非下民。

【孔子曰：“君子有九思：视思明，听思聪，色思温，貌思恭，言思忠，事思敬，疑思问，忿思难，见得思义。”】

【禅解】

字字箴铭。未之思也，夫何远之有？君子思不出其位，与此参看。

【孔子曰：“见善如不及，见不善如探汤。吾见其人矣，吾闻其语矣。隐居以求其志，行义以达其道。吾闻其语矣，未见其人也。”】

【齐景公有马千驷，死之日，民无德而称焉。伯夷叔齐饿于首阳之下，民到于今称之。其斯之谓与？】

【陈亢问于伯鱼曰：“子亦有异闻乎？”对曰：“未也。尝独立，鲤趋而过庭。曰：‘学《诗》乎？’对曰：‘未也。’‘不学《诗》，无以言。’鲤退而学《诗》。他日又独立，鲤趋而过庭。曰：‘学《礼》乎？’对曰：‘未也。’‘不学《礼》，无以立。’鲤退而学《礼》。闻斯二者。”陈亢退而喜曰：“问一得三，闻《诗》，闻《礼》，又闻君子之远其子也。”】

【禅解】

未得谓得，枉了一个空欢喜，可笑可笑。

【邦君之妻，君称之曰夫人，夫人自称曰小童；邦人称之曰君夫人，称诸异邦曰寡小君；异邦人称之亦曰君夫人。】

阳货第十七

【阳货欲见孔子，孔子不见，归孔子豚。孔子时其亡也，而往拜之，遇诸涂。谓孔子曰：“来！予与尔言。”曰：“怀其宝而迷其邦，可谓仁乎？”曰：“不可。”“好从事而亟失时，可谓知乎？”曰：“不可。”“日月逝矣，岁不我与。”孔子曰：“诺。吾将仕矣。”】

【禅解】

“时其亡”，只是偶值其亡耳。孟子作“瞰其亡”，便令孔子作略，仅与阳货一般，岂可乎哉！

【子曰：“性相近也，习相远也。”】

【禅解】

性近习远，方是不变随缘之义。孟子道性善，只说人道之性，以救时耳。

【子曰：“唯上知与下愚不移。”】

【禅解】

除却上知下愚，便皆可移。既未到“上知”，岂可不为之堤防？既不甘“下愚”，岂可不早思移易？

【子之武城，闻弦歌之声。夫子莞尔而笑，曰：“割鸡焉用牛刀？”子游对曰：“昔者偃也闻诸夫子曰：‘君子学道则爱人，小人学道则易使也。’”】

【子曰：“二三子！偃之言是也。前言戏之耳。”】

【公山弗扰以费畔，召，子欲往。子路不说，曰：“未之也已，何必公山氏之之也。”子曰：“夫召我者而岂徒哉？如有用我者，吾其为东周乎？”】

【禅解】

原不说公山决能用我。

卓吾云：言必为西周，不为东周也。

【子张问仁于孔子。孔子曰：“能行五者于天下，为仁矣。”请问之。曰：“恭、宽、信、敏、惠。恭则不侮，宽则得众，信则人任焉，敏则有功，惠则足以使人。”】

【禅解】

要以此五者行于天下方是仁，不得舍却天下而空言存心，以天下不在心外，而心非肉团故也。

【佛肸召，子欲往。子路曰：“昔者由也闻诸夫子曰：‘亲于其身为不善者，君子不入也。’佛肸以中牟畔，子之往也，如之何！”子曰：“然。有是言也。不曰坚乎，磨而不磷；不曰白乎，涅而不缁。吾岂匏瓜也哉？焉能系而不食？”】

【禅解】

磨得磷的，便非真坚；涅得缁的，便非真白。“匏瓜”，用为浮囊，而不用作食器，只是一偏之用。圣人无用，无所不用，故云“吾岂匏瓜”，乃显无可无不可，犹如太虚空然，不可唤作一物耳，非是要与人作食器也。若作食器，纵使瑚琏，亦可磷可缁矣。

【子曰：“由也，女闻六言六蔽矣乎？”对曰：“未也。”“居！吾语女。好仁不好学，其蔽也愚；好知不好学，其蔽也荡；好信不好学，其蔽也贼；好直不好学，其蔽也绞；好勇不好学，其蔽也乱；好刚不好学，其蔽也狂。”】

【禅解】

若不好学，则仁知等皆虚名耳。“言”者，但有虚名，非实又也。“蔽”，却是实病矣。

【子曰：“小子！何莫学夫《诗》？《诗》，可以兴，可以观，可以群，可以怨。迩之事父，远之事君。多识于鸟兽草木之名。”】

【禅解】

今人都不曾学《诗》。

【子谓伯鱼曰：“女为《周南》、《召南》矣乎？人而不为《周南》、《召南》，其犹正墙面而立也与？”】

【禅解】

“为”字妙，直须为文王，为周公，始非面墙。

【子曰：“礼云礼云，玉帛云乎哉？乐云乐云，钟鼓云乎哉？”】

【禅解】

与“人而不仁章”参看。

【子曰：“色厉而内荏，譬诸小人，其犹穿窬之盗也与？”】

【禅解】

的当之甚，刻毒之甚。

【子曰：“乡原，德之贼也。”】

【子曰：“道听而涂说，德之弃也。”】

【禅解】

“乡原”只好偷石人石马，“道听途说”连石人石马也偷不得。

【子曰：“鄙夫可与事君也与哉？其未得之也，患得之；既得之，患失之。苟患失之，无所不至矣。”】

【禅解】

照妖镜，斩妖剑。

【子曰：“古者民有三疾，今也或是之亡也。古之狂也肆，今之狂也荡；古之矜也廉，今之矜也忿戾；古之愚也直，今之愚也诈而已矣。”】

【禅解】

葛可久顶门针，不知远救得否？可悲！可怜！

【子曰：“巧言令色，鲜矣仁。”】

【子曰：“恶紫之夺朱也，恶郑声之乱雅乐也，恶利口之覆邦家者。”】

【禅解】

二“也”字，一“者”字，宾主历然。

【子曰：“予欲无言。”子贡曰：“子如不言，则小子何述焉？”子曰：“天何言哉？四时行焉，百物生焉，天何言哉？”】

【禅解】

“无言”岂是“不言”；“何言”却是“有言”。说时默，默时说，参！

【孺悲欲见孔子，孔子辞以疾。将命者出户，取瑟而歌。使之闻之。】

【宰我问：“三年之丧，期已久矣。君子三年不为礼，礼必坏；三年不为乐，乐必崩。（唤甚么作礼乐，可耻可耻！）旧谷既没，新谷既升，钻燧改火，期可已矣。”子曰：“食夫稻，衣夫锦，于女安乎？”曰：“安。”（丧心病狂）“女安则为之！夫君子之居丧，食旨不甘，闻乐不乐，居处不安，故不为也。（真礼真乐，和盘托出）今女安，则为之！”宰我出，子曰：“予之不仁也！子生三年，然后免于父母之怀。夫三年之丧，天下之通丧也。予也有三年之爱于其父母乎？”】

【禅解】

难道三年之丧，便报得三年之爱？且就人情真切处点醒之耳。

陈曼昭曰：宰我答安，真有调达入地狱的手段。得他此答，方引出孔子一番痛骂，方使天下后世之为子者，皆不得安；方杜绝千古世后，欲短丧之邪说。

【子曰：“饱食终日，无所用心，难矣哉！不有博弈者乎，为之犹贤乎已。”】

【禅解】

好行小慧，无所用心，俱难矣哉，须是居易以俟命。

【子路曰：“君子尚勇乎？”子曰：“君子义以为上。君子有勇而无义为乱，小人有勇而无义为盗。”】

【禅解】

勇者夺魄。

【子贡曰：“君子亦有恶乎？”子曰：“有恶：恶称人之恶者，恶居下流而讪上者，恶勇而无礼者，恶果敢而窒者。”曰：“赐也亦有恶乎？”“恶徼以为知者，恶不孙以为勇者，恶讦以为直者。”】

【禅解】

大须各自简点，莫使此二人恶。

【子曰：“唯女子与小人为难养也，近之，则不孙；远之，则怨。”】

【禅解】

曲尽女子、小人情状。

【子曰：“年四十而见恶焉，其终也已。”】

【禅解】

“恶”字，不作去声读。“见恶”，谓尚不能改恶从善也。虽云改过可贵，但四十不改，恐终不能改矣，故警励之，意欲其奋发速改也。

微子第十八

【微子去之，箕子为之奴，比干谏而死。孔子曰：“殷有三仁焉。”】

【禅解】

异世者，却知其仁；同时者，却云不知其仁。孔子于“仁”字，何等认得清楚。岂似子路、子贡、子张、武仙等，隔墙猜谜乎？

卓吾曰：千古只眼。

方外史曰：若据后儒见识，则微子之去，箕子之陈《洪范》于武王，安得与比干同论？呜呼！仁理之不明也久矣。

【柳下惠为士师，三黜。人曰：“子未可以去乎？”曰：“直道而事人，焉往而不三黜？枉道而事人，何必去父母之邦。”】

【禅解】

卓吾曰：有见有守。

方外史曰：惟见得真，故守得定。

【齐景公待孔子，曰：“若季氏则吾不能，以季、孟之闲待之。”曰：“吾老矣，不能用也。”孔子行。】

【齐人归女乐，季桓子受之。三日不朝，孔子行。】

【楚狂接舆歌而过孔子曰：“凤兮！凤兮！何德之衰？往者不可谏，来者犹可追。已而，已而！今之从政者殆而！”孔子下，欲与之言。趋而辟之，不得与之言。】

【禅解】

又是圣人一个知己。“趋而辟之”。尤有禅机。

【长沮、桀溺耦而耕，孔子过之，使子路问津焉。长沮曰：“夫执舆者为谁？”子路曰：“为孔丘。”曰：“是鲁孔丘与？”曰：“是也。”曰：“是知津矣。”(好赞词！)问于桀溺。桀溺曰：“子为谁？”曰：“为仲由。”曰：“是鲁孔丘之徒与？”对曰：“然。”曰：“滔滔者，天下皆是也，而谁以易之？且而与其从辟人之

士也，岂若从辟世之士哉！”纒而不辍。(辟人之士，错看孔子)子路行以告，夫子恍然曰：“鸟兽不可与同群，吾非斯人之徒与而谁与？(可见不是辟人之士)天下有道，丘不与易也。”(菩萨心肠，木铎职分)】

【子路从而后，遇丈人，以杖荷蓑。子路问曰：“子见夫子乎？”(问得满撞)丈人曰：“四体不勤，五谷不分，孰为夫子？”(答得清楚)植其杖而芸，子路拱而立。止子路宿，杀鸡为黍而食之，见其二子焉。(露出马脚，惹出是非)明日，子路行以告，子曰：“隐者也。”使子路反见之。(赵州勘婆子)至，则行矣。(勘破了也！)】

【子路曰：“不仕无义。长幼之节，不可废也；君臣之义，如之何其废之？欲洁其身，而乱大伦。君子之仕也，行其义也。道之不行，已知之矣。”】

【禅解】

此数句，绝不似子路之言，想是夫子教他的。幸得丈人不在，不然，却被丈人勘破。

【逸民：伯夷、叔齐、虞仲、夷逸、朱张、柳下惠、少连。子曰：“不降其志，不辱其身，伯夷、叔齐与！”谓：“柳下惠、少连，降志辱身矣。言中伦，行中虑，其斯而已矣。”谓：“虞仲、夷逸，隐居放言。身中清，废中权。我则异于是，无可无不可。”】

【禅解】

“异于是”，谓异于“不降”、“不辱”，异于“降志辱身”，异于“隐居放言”也。非谓异于“逸民”也。以“无可无不可”而附于“逸民”之科，又是木铎一个注脚。

【大师挚适齐，亚饭干适楚，三饭缭适蔡，四饭缺适秦。鼓方叔入于河，播鼗武入于汉，少师阳、击磬襄入于海。】

【禅解】

凄怆之景，万古堕泪，亦可助发苦空无常观门。

【周公谓鲁公曰：“君子不施其亲，不使大臣怨乎不以。故旧无大故，则不弃也。无求备于一人。”】

【周有八士：伯达、伯适、仲突、仲忽、叔夜、叔夏、季随、季騫。】

子张第十九

【子张曰：“士见危致命，见得思义，祭思敬，丧思哀，其可已矣。”】

【禅解】

卓吾云：“致命”不用“思”字，有理。

【子张曰：“执德不弘，信道不笃，焉能为有？焉能为亡？”】

【禅解】

卓吾云：骂得狠！

方外史曰：“弘”字，“笃”字，用得妙！

【子夏之门人问交于子张。子张曰：“子夏云何？”对曰：“子夏曰：‘可者与之，其不可者拒之。’”子张曰：“异乎吾所闻：君子尊贤而容众，嘉善而矜不能。我之大贤与，于人何所不容？我之不贤与，人将拒我，如之何其拒人也？”】

【禅解】

母友不如己者，原不是“拒人”。

【子夏曰：“虽小道，必有可观者焉；致远恐泥，是以君子不为也。”】

【子夏曰：“日知其所亡，月无忘其所能，可谓好学也已矣。”】

【禅解】

此便是子夏之学，不是孔子之学，所谓“小人儒”也。

【子夏曰：“博学而笃志，切问而近思，仁在其中矣。”】

【禅解】

此却说得出味。

【子夏曰：“百工居肆以成其事，君子学以致其道。”】

【禅解】

逼真好同喻。

【子夏曰：“小人之过也必文。”】

【禅解】

卓吾云：今人倘有“文过”之念，此念便是小人了。

【子夏曰：“君子有三变：望之俨然，即之也温，听其言也厉。”】

【禅解】

像赞。

【子夏曰：“君子信而后劳其民，未信则以为厉己也；信而后谏，未信则以为谤己也。”】

【禅解】

小心天下去得。

【子夏曰：“大德不踰闲，小德出入可也。”】

【禅解】

卓吾曰：最方而最圆。“出入”，形容其活动耳，云何便说未尽合理？

方外史曰：若不合理，何名“小德”。

【子游曰：“子夏之门人小子，当洒扫、应对、进退，则可矣。抑末也，本之则无。如之何(钳锤小子)？”子夏闻之曰：“噫！言游过矣！君子之道，孰先传焉？孰后倦焉(点化小子)？譬诸草木，区以别矣(激砺小子)。君子之道，焉可诬也？有始有卒者，其惟圣人乎(怱愚小子)！”】

【禅解】

子游之讥，是要门人知本。子夏之辩，是要门人即末悟本。只此洒扫、应对、进退

，若以为末，到底是末，若知其本，头头皆本。二贤各出手眼接引门人，莫作是非会也。

【子夏曰：“仕而优则学，学而优则仕。”】

【禅解】

卓吾曰：今入学未优，则已仕矣。仕而优，如何肯学？

方外史曰：惟其学未优便仕，所以仕后永无优时。

【子游曰：“丧致乎哀而止。”】

【子游曰：“吾友张也，为难能也。然而未仁。”】

【曾子曰：“堂堂乎张也，难与并为仁矣。”】

【禅解】

好朋友真难得，今人那肯如此说病痛！

【曾子曰：“吾闻诸夫子：人未有自致者也，必也亲丧乎！”】

【曾子曰：“吾闻诸夫子：孟庄子之孝也，其它可能也；其不改父之臣，与父之政，是难能也。”】

【孟氏使阳肤为士师，问于曾子。曾子曰：“上失其道，民散久矣。如得其情，则哀矜而勿喜。”】

【禅解】

惟至孝者，方能至慈，堪为万世士师座右铭。

【子贡曰：“纣之不善，不如是之甚也。是以君子恶居下流，天下之恶皆归焉。”】

【禅解】

殷鉴不远。

【子贡曰：“君子之过也，如日月之食焉：过也，人皆见之；更也，人皆仰之。”】

【禅解】

光明正大之论！

【卫公孙朝问于子贡曰：“仲尼焉学？”子贡曰：“文武之道，未坠于地，在人。贤者识其大者，不贤者识其小者，莫不有文武之道焉。夫子焉不学？而亦何常师之有？”】

【禅解】

卫公孙朝，问于子贡曰：“仲尼焉学？”子贡

卓吾曰：分明说他师文武，而语自圆妙。

【叔孙武叔语大夫于朝，曰：“子贡贤于仲尼。”子服景伯以告子贡。子贡曰：“譬之宫墙，赐之墙也及肩，窥见室家之好。夫子之墙数仞，不得其门而入，不见宗庙之美，百官之富。得其门者或寡矣。夫子之云，不亦宜乎！”叔孙武叔毁仲尼。子贡曰：“无以为也，仲尼不可毁也。他人之贤者，丘陵也，犹可踰也；仲尼，日月也，无得而踰焉。人虽欲自绝，其何伤于日月乎？多见其不知量也！”】

【陈子禽谓子贡曰：“子为恭也，仲尼岂贤于子乎？”子贡曰：“君子一言以为知，一言以为不知，言不可不慎也。夫子之不可及也，犹天之不可阶而升也。夫子之得邦家者，所谓立之斯立，道之斯行，绥之斯来，动之斯和。其生也荣，其死也哀，如之何其可及也。”】

【禅解】

卓吾曰：对痴人不得不如此浅说。

方外史曰：世间痴人都如此，向他说极浅事，他便见得深；向他说极深理，他既不知，反认作浅。

【尧曰：“咨！尔舜！天之历数在尔躬。允执其中。四海困穷，天禄永终。”舜亦以命禹。曰：“予小子履，敢用玄牡，敢昭告于皇天后帝：有罪不敢赦。帝臣不蔽，简在帝心。朕躬有罪，无以万方；万方有罪，罪在朕躬。”周有大赉，善人是富。“虽有周亲，不如仁人。百姓有过，在予一人。”谨权量，审法度，修废官，四

方之政行焉。兴灭国，继绝世，举逸民，天下之民归心焉。所重：民、食、丧、祭。】

【禅解】

“修己以敬”四字，便是帝王道脉，历历可考。

【宽则得众，信则民任焉，敏则有功，公则说】

【子张问于孔子曰：“何如斯可以从政矣？”子曰：“尊五美，屏四恶，斯可以从政矣。”子张曰：“何谓五美？”子曰：“君子惠而不费，劳而不怨，欲而不贪，泰而不骄，威而不猛。”子张曰：“何谓惠而不费？”子曰：“因民之所利而利之，斯不亦惠而不费乎？择可劳而劳之，又谁怨？欲仁而得仁，又焉贪？君子无众寡，无小大，无敢慢，斯不亦泰而不骄乎？君子正其衣冠，尊其瞻视，俨然人望而畏之，斯不亦威而不猛乎？”子张曰：“何谓四恶？”子曰：“不教而杀谓之虐；不戒视成谓之暴；慢令致期谓之贼；犹之与人也，出纳之吝，谓之有司。”】

【子曰：“不知命，无以为君子也。不知礼，无以立也。不知言，无以知人也。”】

【禅解】

“知命”，只是深信因果耳。“知礼”，则善于观心，所谓约之以礼。“知言”，则善于闻法，所谓了达四悉因缘。